

四庫全書

子部

欽定四庫全書

子部  
老子翼卷二

詳校官侍郎臣謝墉

檢討臣何思鈞覆勘

總校官編修臣王燕緒

校對官助教臣羅萬選

謄錄監生臣趙興文

欽定四庫全書

老子翼卷二

下篇

明 焦竑 撰

上德不德是以有德下德不失德是以無德上德無為  
而無以為下德為之而有以為上仁為之而無以為上  
義為之而有以為上禮為之而莫之應則攘臂而仍之  
故失道而後德失德而後仁失仁而後義失義而後禮

夫禮者忠信之薄而亂之首也前識者道之華而愚之始也是以大丈夫處其厚不處其薄居其實不居其華

故去彼取此無以為用也仍一作扔夫音符前識如釋典前塵之前非有諸己之謂也處上聲

蘇注聖人從心所欲不踰矩非有意于德而德自足其下知德之貴勉強以求不失蓋僅自完耳而何德

之有無為而有以為之則猶有為也唯無為而無以為者可謂無為矣其下非為不成然猶有以為之非徒作而無術者也仁義皆不免于為之矣其所以異者仁以無以為為勝義以有以為為功耳德有上下而仁義有上無下何也下德在仁義之間而仁義之下者不足復言故也自德以降而至于禮聖人之所以齊民者極矣故為之而不應則至于攘臂而強之強之而不應于是刑罰興而兵甲起則徒作而無術矣忠信而無禮則是

忠信不見禮立而忠信之美發越于外君臣父子之間  
夫婦朋友之際其外燦然而中無餘矣故順之則治違  
之則亂治亂之相去其間不能以髮故曰亂之首也聖  
人立覽萬物是非得失畢陳于前如鑑之照形無所不  
見而孰為前後世人視止于目聽止于耳忠止于心冥  
行于萬物之間役智以求識而偶有見焉雖自以為明  
而不知至愚之自始也世之鄙夫樂其有得于下而忘  
其上故喜薄而遺厚采華而弃實非大丈夫孰能去彼  
此取

呂注

道之可道非常道則庸有得而有之者乎上德者  
以無得為得唯其無得乃所以得也故曰上德不

德是以有德下德者以不失之為得者也唯其不失故  
雖得而非德故曰下德不失德是以無德上德無為非  
故無為也率德之自然而實無以為也下德不知出此  
而為之故不能不有以為也夫德無以為足矣而且有

仁焉則是為之也然上仁者之于仁無所事仁而仁者也是為之而無以為也仁則不可獨者也必有義焉雖上義不得不為者也是為之而有以為也仁者施之而已義則擇所施之宜者也未責所報也禮則施報矣來而不往非禮往而不來亦非禮施報之義也上禮為之而莫之應則攘臂而仍之以其往而不來雖不以禮繼之猶不為非禮以禮之理固如是也上仁上禮上義猶如此則其下者不論而見矣由是觀之失道而後德失德而後仁失仁而後義失義而後禮宜虛言哉禮之相責望者如彼則忠信自此薄亂爭自此起而智謀之所用用也是禮雖所以治亂適所以首亂也前識雖所以用智乃所以始愚也夫何故人之治常生于厚厚則其性薄則其偽去性而作偽未有不亂者也人之自知常在于明明則其實智則其華離實而務華則未有不愚者也是以大丈夫處其厚不處其薄居其實不居其華故志仁義絕禮學遺智慧而志于道德之大全是之謂

去彼  
取此

息齋注

上德不德則在仁而仁在義而義惟其所之未嘗執也下德不失德則仁之不可為義義之不

可為禮既已為之則不可得而變故上德不失道道常無為而無為之心下德不失德德則有為而有為之迹夫上德無為仁是也仁近于道故曰仁者人也合而言之道也仁近于道故亦無為亦無以為降而為義義者宜也以義宜物則有以為不失宜為而未失又降而為禮禮者理也以禮理物苟莫之應而吾必欲理之則有攘臂而仍之者蓋不可得謂之道可得謂之德德在人謂之仁仁不失其宜謂之義義以正物謂之禮故失道而德失德而仁失仁而義失義而禮自然之次也自道五降而至于禮五降之後不足觀矣夫禮由亂而作因其有長幼無禮則亂故立禮以救之然至攘臂而仍之則禮亦隨喪然則禮者亂之首也多知不足以

為道由其多知惑亂本真知不從真浮妄無實然則多  
知者愚之始也故禮為忠信之薄而識為知道之華聖  
人處厚不處薄貴實不  
貴華故常不失道本

宏甫注

無為也而亦無為也是謂上德黃帝是也其  
次雖為之而實無為是謂上仁堯之仁如天是

也又其次不惟為之而且有必為之心是上義也舜禹  
以下聖人是也夫失道而德失德而仁失仁而義至于  
失義而後禮則所以為之者極矣故為而不應則至于  
攘臂攘臂不應則刑罰甲兵相因而起矣是亂之首而  
忠信之薄也凡此者皆以識智在前為道之障不知德  
也仁也義也禮也皆道之華而愚民之始有真智者所  
不處也夫華者不實實則厚華則不厚安有大丈夫而  
不知處厚乎欲處厚者所當去識求智而後無為大道  
也  
可幾



嚴君平解

虛無無為開導萬物謂之道人清靜因應無所不為謂之德人兼愛萬物博施無窮謂之

仁人理名正實處事之宜謂之義人謙退辭遜恭以守和謂之禮人此五者皆可道之陳迹非至至者也至至者一尚不存安有其五故帝王根本道為之元德為之始道失而德次之德失而仁次之仁失而義次之義失而禮次之禮失而亂次之凡此五者道之以一體而世主之長短也故所為非其所欲所求非其所得不務自然而務小薄也夫禮之為事中外相違華威而實虧未隆而本衰禮薄於忠權輕於威信不及義德不逮仁為治之末為亂之元詐偽所起忿爭所因故莊子曰聖人行不言之教道不可致德不可至仁可為也義可虧也禮相偽也此之謂也

韓非解

仁者謂其中心欣然愛人也其喜人之有福而惡人之有禍也生心之所不能已也非求其報

也故曰上仁為之而無以為也義者君臣上下之禮父子貴賤之差也知交朋友之接也親疎內外之分也臣事君宜下懷上子事父宜賤敬貴宜知交朋友之相助也宜親者內而疎者外宜義者謂其宜也宜而為之故曰上義為之而有以為也禮者所以貌情也羣義之文章也君臣父子之交也貴賤賢不肖之所以別也中心懷而不諭故疾趨卑拜而明之實心愛而不知故好言繁辭以信之禮者外飾之所以諭內也故曰禮以情貌也凡人之為外物動也不知其為身之禮也衆人之為禮也以尊他人也故時勸時衰君子之為禮以為其身故神之為上禮上禮神而衆人貳故不能相應故曰上禮為之而莫之應衆人雖貳聖人之復恭敬盡手足之禮也不衰故曰操臂而仍之禮為情貌者也文為質飾者也夫君子取情而去貌好質而惡飾夫恃貌而論情者其情惡也須飾而論質者其質衰也何以論之和氏之璧不飾以五采隋侯之珠不飾以銀黃其質至美物

不足以飾之夫物之待飾而後行者其質不美也是以父子之間具禮而不明故曰禮薄也凡物不並盛陰陽是也理相奪予威德是也實厚者貌薄父子之禮是由是觀之禮繁者實心衰也然則為禮者事通人之樸心者也衆人之為禮也人應則輕歡不應則責怨今為禮者事通人之樸心而資之以相責之分能無爭乎有爭則亂故曰夫禮者忠信之薄也而亂之首乎

### 筆乘

首亂始愚極言禮智流弊所至耳莊子舉老子此言而論之曰今已為物也欲復歸根不亦難乎其易也其惟大人乎雖然既歸其根孰為物孰為非物故又曰匿而不可不為者事也遠而不可不居者義也親而不可不廣者仁也節而不可不積者禮也中而不可不高者德也一而不可不易者道也此數者雖有上下先後之異而以聖人用之皆道也蓋聖人百慮同歸二際俱泯豈復有彼此去取邪

替之得一者天得一以清地得一以寧神得一以靈谷  
得一以盈萬物得一以生侯王得一以為天下貞其致  
之一也天無以清將恐裂地無以寧將恐發神無以靈  
將恐歇谷無以盈將恐竭萬物無以生將恐滅侯王無  
以貞而貴高將恐蹙故貴以賤為本高以下為基是以  
侯王自謂孤寡不穀此其以賤為本邪非乎故致數與  
無與不欲瑒瑒如玉落落如石

裂破毀也發發泄也歇  
消滅也竭枯竭也蹙音

厥顛仆也  
數上聲

蘇注

物一道也物之所以得為物者皆道也天下之人見

靈而巳谷知其盈而巳萬物知其生而已侯王知其為  
天下貞而已不知其所以得此者皆道存焉耳致之言  
極也天不得一未遽裂也地不得一未遽發也神不得  
一未遽歇也萬物不得一未遽滅也侯王不得一未遽  
變也然其極必至此耳天地之大侯王之賢皆一之致  
夫一果何物也視之不見執之不得則亦天地之至微  
也此所謂賤且下也本也皆之稱孤寡不穀者亦舉其  
本而遺其末耳輪輻蓋軫衡輓轂轄會而為車物物可  
數而車不可數然後知無有之為車所謂無之以為用  
者也然則天地將以大為天地邪侯王將以貴為侯王  
邪大與賢之中有一存焉此其所以為天地侯王者而  
人莫或知之耳故一處貴而非貴處賤而非賤非若玉  
之珠琇寶而不能賤石  
之落落賤而不能貴也

呂注

道一而已而得之則得之者與道為二非一也唯其得之而無得故謂之得一也皆之得一者莫不

也然也仰之而天也得一以清故覆焉而不傾俯之而地也得一以寧故載焉而不陷神無形而至寂者也以得一故妙乎有生而靈谷有形而至虛者也以得一故應乎所感而盈其衆為萬物以得一故生而無極其尊為侯王以得一故能制天下之動而貞夫一則一之不可不致也如此故一者天之所以清地之所以寧寂之所以靈虛之所以盈萬物之所以生而侯王之所以為天下貞者也使天無以清則裂地無以寧則發神無以靈則歇谷無以盈則竭萬物無以生則滅而侯王也無以為貞而唯貴高之知其得不慶邪故貴以賤為本則未有貴者乃貴之所自而起也然則貴而無其貴高而無其高乃高之所自而起也然則貴而無其貴高而無其高乃侯王之所以為天下貞而不慶者邪是以孤寡不殺人之所惡而賤也而貴高以為稱者以其所本為在此也

故致數而極之以至于一則貴不異乎賤卑不離乎高而譽出於無譽夫譽無譽則毀無毀矣譽無譽則不可得而貴毀無毀則不可得而賤玉不可貴故球之石可賤故落之不欲球球如玉落落如石不可得而貴賤之謂也

息齋注

孔子曰吾道一以貫之一者何也天之清地之寧神之靈谷之盈物之生侯王之貞極其致無

不同知天之所以清即知地之所以生即知神之所以靈即知谷之所以盈知物之所以生即知侯王之所以貞易曰天下殊途而同歸百慮而一致天下何思何慮言其未嘗不一也若不知一則必自異自異則絕物侯王絕物亦絕之故貴以賤為本高以下為基侯王自稱孤寡不穀此豈非知貴以賤為本邪輪蓋輻軫會而為車物物有名而車不可名仁義禮智合而為道仁義可名而道不可名賞罰刑政合而為治賞罰可名而治不可

可名苟有可執使其跡外見貴者如玉賤者如石皆可以指名而人始得而貴賤之矣

宏甫注

侯王不知致一之道與庶人同等故不免以貴自高高者必屢下其基也貴者必屢賤其本也

何也致一之理庶人非下侯王非高在庶人可言貴在侯王可言賤持未知之耳今夫輪輻蓋軫衡輓轂轆轤會而成車人但見有此數者曷嘗有車哉然而名之曰車而不曰輪輻蓋軫衡輓轂轆轤也由此觀之則所謂高下貴賤者可知矣人見其有貴有賤有高有下而不知其致之一也曷嘗有高下貴賤者哉彼魯而不能賤賤而不能譽據吾所見而不能致之一也則亦碌碌落落如玉如石而已矣

反者道之動弱者道之用天下之物生於有有生於無

反復也須溪云反者動之極則必歸也是其反也正以其動也非動無反



蘇注

復性則靜矣然其寂然不動感而遂通天下之故則動之所自起也道無形無聲天下之弱者莫如

道然而天下之至強莫加焉此其所以能用萬物也世不知靜之為動弱之為強故告之以物之所自生者蓋天下之物聞有母制子未聞有以子制母者也

介甫解

道之用所以在于弱者以虛而已即在天者而觀之指我亦勝我躡我亦勝我則風之行乎太

虛可謂弱矣然無一物不在所鼓舞無一形不在所披拂則風之用在乎弱也即在地者而觀之決諸東方則東流決諸西方則西流則水之託于淵虛可謂弱矣然處衆人之所惡而攻堅強者莫之能先則水之用在乎弱也又曰反非所以為動然有所謂動者動于反也弱非所以為強然有所謂強者蓋弱則能強也雖然言反而不言靜言弱而不言強言動則知反之為靜言弱則知用之為強天下之物生于有有生于無亦若此而已

矣

呂注

道之周行萬物非不逝也而其動常在于反所謂

不強也而其用常在于弱所謂天下之至柔馳騁天下之至堅無有入于無間者是也故天下之物生於有生於無唯有為能生天下之物而無又能生天下之有則道之動在於反而其用在於弱可知已然則欲反而弱乎無他致一以極乎無而已矣

趙志堅注

反歸本也凡人以移故就新為動為道者捨末反本故云道之動蓋身安心寂不動也捨

有歸無云動也亦猶遠曰返先既不去非遠也為無體名遠也今亦不來非近也為身有之名返也道無來往而有遠返之名心本安然亦有反動之義內心虛靜外行柔弱者是反本之行故云弱者道之用有者氣也物

雖未形已有是氣故云有天地萬法從一氣而生故云  
生于有無道也一氣從道生故言生于無推極生源指  
道為極欲令學者歸心有  
所前言反者反歸此無也

**息齋注**

天下萬物生而為有自有反無然後為道故曰  
反者道之動天下之有皆生于無有則必強反

強為弱則可以漸求于道故曰弱者道之  
用反者自有而求無弱者致無而求道

**筆乘**

天下之物生於有所謂有名萬物之母是已有生  
於無所謂無名天地之始是已無必生有是故貴

其反反者反於無也有生於無  
是故貴其弱弱者無之似也

上士聞道勤而行之中士聞道若存若亡下士聞道大  
笑之不笑不足以為道故建言有之明道若昧進道若

退夷道若類上德若谷大白若辱廣德若不足建德若

偷質真若渝大方無隅大器晚成大音希聲大象無形

道隱無名夫唯道善貸且成

建立也偷苟且也渝羊朱反變改也傳奕音義云古

本作輸廣雅曰輸愚也或作渝董遇作搖今從王弼傳奕作渝應人之乏而終以見還曰貸趙志堅云貸者暫

借非長與也且者權成非久固也欲使蒙貸者不長往得成者非久住感貸荷成速歸於道

希聲注

易曰形而下者謂之器器也者止乎形內者也上士形而下者謂之器器也者止乎形內者也上士

知微知彰通乎形外故聞道而信則勤行之中士在微彰之際處道器之間故聞道而疑信相半故若存若亡

下士知彰而不知微止乎形內故聞道則大笑之不唯笑之且將非之矣夫道也者微妙玄通深不可識苟不

為下士所非笑則不足以為道矣夫體道者與日月合其貞明而其光不耀斯明道若昧也與天地合其易簡而其用不可為典要斯夷道若類也與四時合其運行而其動必反於玄妙斯進道若退也常處卑下而終不可渝斯上德若谷也常若溷濁而終不可涅斯大白若辱也衣被天下而不有其仁斯廣德若不足也生畜萬物而不顯其功斯建德若偷也復其性以御其情斯質真若渝也正乎內而行乎外斯大方無隅也以若拙之匠陶甄天下而不為近功斯大器晚成也以不言之教鼓動萬物而不事小說斯大音希聲也事无事莫觀其用斯大象无形也為无為莫識其體斯道隱无名也夫唯善濟貸于萬物而不責其報是以萬物受其生成而不知其德故下士聞此道而笑之不信其能若此耳

蘇注

道非形不可見非聲不可聞不先知萬物之妄廓然無蔽卓然有見未免于不信也故下士聞道以

為荒唐謬悠而笑之中士聞道與之存亡出沒而疑之  
惟了然見之者然後勤行服膺而不忘孔子曰語之而  
不情者其回也與斯所謂上士也哉建立也古之立言  
者有是說而老子取之下之所陳者是也無所不照而  
非察也若止不行而天下之速者莫之或先也或夷或  
類所至則平而未嘗削也上德不德如谷之虛也大白  
若辱者使曰而不受污此則不屑不潔之士而非聖人  
也廣德若不足者廣大而不可復加則止于此而已非  
廣也建德若偷因物之自然而無立者外若偷情而實  
建也質真若渝體聖抱神隨物變化而不失其貞者外  
若渝也大方無隅全其大方不立圭角也大器晚成  
器大不可近用也大音希聲非耳之所得聞也大象無  
形非目之所得見也道之所寓無所不見凡此十二者  
皆道之見于事者也而道之大全則隱于無名惟其所  
寓推其有餘以貸不足  
物之賴之以成者如此

# 呂注

孔子曰朝聞道夕死可矣則聞道者死生固不足  
以累其心豈苟知之而已哉上士聞道真聞之者

也真聞之則無所復疑特勤而行之而已矣夫道亦何  
以勤行為哉曰觀諸心以契其所聞則勤行之謂也中  
士聞道聞之而未審焉者也故若存若亡若存若亡則  
不能勤行之一出焉一入焉而已矣下士聞道聞之而  
不信者也故大笑之所以大笑者以情求之而不得故  
也使道而可以情求則彼不笑之矣故曰不笑不足以  
為道若古之建言者有之凡皆不可以情求之謂也冥  
冥之中獨見曉焉無聲之中獨聞和焉是之謂明道若  
昧和之以是非而休乎天均則無物不然無物不可是  
之謂夷道若類為道者日損損之又損之以至于無為  
是之謂進道若退上德者無為而無以為者也然其應  
如響斯不亦若谷乎大白者滌除玄覽而無疵者也然  
受天下之垢斯不亦若辱乎廣德者廓乎其無不容也  
而未嘗自見自是自矜自伐也斯不亦若不足乎善建

者不拔而建之以常無有乃確然有見者也故曰建德若偷體性抱神以遊世俗之間而非所驚也故曰質真若渝大方體之無南北爽然四解淪於不測無東西始於玄冥反於大通此大方之無隅也大成若缺然日計之而不足歲計之而有餘此大器之晚成也大音者聽之不可聞故希聲大象者視之不可見故無形凡此者皆道也然謂之明而若昧謂之夷而若類謂之進而若退以至音而希聲象而無形名與實常若相反者也唯道為能如此故既以為人已愈有既以與人已愈多而生之畜之長之育之成之熟之養之覆之莫非道也故曰夫唯道善貸且成

元澤注

竊嘗論此篇曰道不遠人而世莫能觀者不明故也故首之以明道大道甚夷而惟明者能由

之以進故次曰夷道也進道也進于道而復乎性命之常則不德之德也故次之以上德上德者自得其德而



不同乎庶物者也故不染而白以其白自異于物則安能若谷乎故次之以若辱不辱而潔則是伯夷之隘也安能廣乎故若辱而后曰廣德上德而能廣則是與人為徒而可以為君師矣故曰建德若偷偷者不汲汲乎有建者也建德則有所立而離本近偽矣故又要在乎不易吾真故次之以質真其序至此則道之在我者體既具矣故曰大方無隅有大方以為體則所以應無方之博而可以緒餘為人矣故曰大器大器者業也至人以其糠粃土直為器而器未嘗不大也孔子以管仲為小器則帝王之功其大器乎道雖為此而要其終則未嘗為也未嘗有也故曰大音也大象也然則既盡之矣故能與道為一而供萬物之求成萬物之性也嗚呼是道也不可以識識而况于以言言乎而余論之者亦其粗而已矣

息齋注

上士聞道雖衆人譏詆不能使之不動中士聞道雖不能無信亦不能使之無疑下士聞道雖

聖人復起不能使之不笑蓋膠于有者天下皆是彼方以有為實今遂告以有之非實而無之為真其誰不疑且笑故不笑不足以為道亦理之當然不足怪也上士之勤非能勤也有見而勤下士之笑非故笑也無見而笑上不至于勤下不至于笑不能無見而又不能信其所見雖使之不疑不可得也古之立言蓋有之矣明道者自明非色之明外不得而見其明故曰其明若昧進道者自進非力之進外不得而知其進故曰其進若退夷道無所不平彼以彼之平猶吾平也故曰若類上德無所不容彼雖恢奇譎怪而吾以一視之故曰若谷大白不汙其性苟性不汙和其塵皆可也故曰若辱廣德必有見於大苟見于大雖欲使之息不可得也故曰若不足建德者內立自性自性有立則接物必簡故曰若偷質真者不徇于外外不徇則惟吾所之故曰若變大方無隅非廉隅可得而察也大器晚成非成不成可得而盡也大音希聲非聲音可得而知也大象無形非形

器可得而執也中下之人方役其所見而議吾之跡以實味實退實類實辱實偷實渝其不侮笑者幾希矣蓋大道無名隱而不可見至其貸以曲成乃其小小者爾非其實也上士知其無名略其貸而識其大故亦不可以議其名中下之士執其貸且成者以議全此其所以愈議而愈非也

筆乘

上士者恬惔寂寞虛無為者也勤於此則勤行之至而實無所勤行也斯所謂天然縣解矣而下士患足以知之君平曰中士所聞非至美也下士所見非至善也中士所眩下士所笑乃美善之美善者也

道生一一生二二生三三生萬物萬物負陰而抱陽沖

氣以為和人之所惡惟狐寡不穀而王公以為稱故物或損之而益或益之而損人之所教我亦教之強梁者

不得其死吾將以為教父

凡動物背止於後陰靜也耳  
目口鼻居前陽動也故曰負

陰抱陽植物則背寒向暖而沖氣運乎其間木絕水曰  
梁木負棟亦曰梁取其力之強也故曰強梁金人銘曰  
強梁者不得其死好勝者必遇其敵蓋古人嘗以此為  
教而我亦教之但老子獨尊之曰教父者如言萬物之  
母之謂母主養父主教故  
言生則曰母言教則曰父

蘇注

夫道非一非二及其與物為偶道一而物不一故  
以一名道然而道則非一也一與一為二二與一

為三自是以往而萬物生物雖有萬不同而莫不負陰  
抱陽沖氣以為和者蓋物生於三而三生於一理之自  
然也世之人不知萬物之所自生莫不賤寡小而貴重  
大然王公之尊而自稱孤寡不穀古之達者蓋已知之  
矣

呂注

故道之在天下莫與之偶者莫與之偶則一而已矣

曰一生二有一有二則有三矣故曰二生三故唯無名則己苟謂之一則其適遠至于三三立而萬物生矣故曰三生萬物凡幽而不測者陰也明而可見者陽也有生者莫不背于幽而不測之陰向于明而可見之陽故曰萬物負陰而抱陽負則背之抱則向之也雖然必有冲氣以為之和蓋陰與陽二也冲氣一也萬物不得一無以生故也故人之所欲者軒冕富貴也而其所惡者孤寡不穀也軒冕在身非性命也物之儻來寄也而遂有之為固則向陽而不知反之甚者也古之制名者以其所惡為王公稱者欲其貴而不忘賤高而不忘下抱而知所負向而知所反以不失乎冲一之和而已故物或損之而益益之而損滿招損謙受益時乃天道也人之所教亦我義教之我之所教道也教而不以我義者則亦非道而已蓋唯通于道者為得一得一則無我

無我不爭夫唯不爭故天下莫能與之爭反是死之徒而已君子之教人雖或不同然至于反一而無我教之所自而生也故曰強梁者不得其死吾將以為教父

息齋注

道生一萬其為道則一亦未生一既不生則安得有二無二則一不散故所以謂之不二言其

未有一也及其有一即有二有陽即有陰有陰有陽則又有陰陽之交故有二則有三至于三則無所不有矣萬物抱陽一也負陰二也陰陽交而沖氣為和三也萬物孰不具此三者然要其本則必歸于道道者未有一之謂也由其本生于道故末而不失道是以天下之物或損之而益或益之而損孤寡不穀而王公以為稱益損之生益也強梁者不得其死蓋益之生損也夫惟損益同源故自損則必益自益則必損聖人未嘗益而自以孤寡不穀為稱蓋欲使人知強梁者不得其死也是謂人之所教我亦教之亦其應世之跡不得不然歟

天下之至柔馳騁天下之至堅無有入於無間吾是以

知無為之有益不言之教無為之益天下希及之

馳騁役使

也堅猶剛強不曰剛強而曰堅變文叶韻也無間無內也至剛者天下莫能勝而至柔能役之無內者天下莫能破而無有能入之二語皆設喻以明無為之有益也

**蘇注**

以堅御堅不折則碎以柔御堅柔亦不靡堅亦不病求之於物則水是也以有入有捍不相受以無

入有無未嘗勞有未嘗覺求之于物則鬼神是也是以聖人唯能無為故能使眾強出入羣有

**呂注**

天下之至柔馳騁天下之至堅觀于物則水是也無有入于無間觀于物則氣是也水以其柔弱故

幾于道然而不能無形者也而猶攻堅強者莫之能先氣以其無質故舍于神然而不能無氣者也猶能入于

無間而況以無形之至柔太易之未見氣於以馳騁天下之至堅而入于無間則孰不為之動而亦何入而不自得哉故曰吾是以知無為之有益也而不言之教無為之益天下希及之是亦不知反其宗而已矣

息齋注

物本非物堅者偽體也雖天下之至堅其極必歸于無今天下之至柔已能馳騁天下之至堅

況於無之真豈不足以破有之偽乎故無有能入無間無間者蹈水火入金石其精不亾之謂也無為之為其為以道不言之教其教以天故無有能及之者

名與身孰親身與貨孰多得與亡孰病是故甚愛必大

費多藏必厚亡知足不辱知止不殆可以長久

多猶重也薛云

知足者樂今有之已多無求者也無求奚辱知止者懼後進之有損知幾者也知幾奚殆



蘇注

先身而後名貴身而賤貨猶未為忘我也忘我者身且不有而況于名與貨乎然貴以身為天下非

忘我不能故使天下知名之不足親貨之不足多而后知貴身知貴身而后知名忘我此老子之意也不得者以亡為病及其既得而患失則病又有甚于亡者惟齊有無均得喪而後無病也愛甚則凡可以求之者無所不為能無費乎藏之多則攻之者必眾能無亡乎

呂注

烈士之所殉者名也而至于殘生傷性則不知身之親于名也故曰名與身孰親貪夫之所殉者貨

也而至于殘生傷性則不知身之多于貨也故曰身與貨孰多所殉者名則世謂之君子所殉者貨則世謂之小人君子小人之所殉雖或不同而亡其所存則一也然則得名與貨而亡其存則不知亡之病于得也故曰得與亡孰病是故愛名欲以貴其身也以甚愛之故并其良貴而失之是大貴也蓄貨欲以富其身也以多藏

之故并其至富而害之是厚也夫唯有德者知至貴之在已而無待于名也故知足而不辱知至富之在已而無待于貨也故知止而不殆不辱不殆則可以長久矣

息齋注

名不親于身貨不多于身得不償其亡而世人每貪于名溺于貨徇于得者由其無所見也我

愛于物愛多則我貴物藏于我物衆則我勞小則辱大則危有不可勝悔者君子則不然知物之備于我自反而足故于外無求雖欲辱之不可得也知吾之所止至于道故非道不為雖欲危之不可得也是以為常常久故能

大成若缺其用不敝大盈若沖其用不窮大直若屈大巧若拙大辯若訥躁勝寒靜勝熱清靜為天下正

蘇注

天下以不缺為成，成必有敵，以不虛為盈，故盈必有窮。聖人要于大成而不邨，其缺期于大盈而

不惡其沖，是以成而不敵，盈而不窮也。直而不屈，其直必折，循理而行，雖曲而直，巧而不拙，其巧必勞，付物自

然，雖拙而巧，辨而不訥，其辨必窮，因理而言，雖訥而辨，成而不缺，盈而不沖，直而不屈，巧而不拙，辨而不訥，譬

如蹠之不能靜，靜之不能躁，耳夫蹠能勝寒而不能唯，熱靜能勝熱而不能勝寒，昏滯于一偏而非其正也。唯

泊然清淨不染于一非，成非缺，非盈非沖，非直非屈，非巧非拙，非辨非訥，而後無所不勝，可以為天下正矣。

呂注

萬物始乎是，終乎是，是大成也。然始無所始，終無所止，故若缺，唯其若缺，故其用日新而不敝。萬物

酌焉而不竭，是盈也。然益之而不加，益故若沖，唯其若沖，故其用日給而不窮。大直者曲之，而全枉之，而直者

也。故若屈，大巧者刻彫，象形而不為巧者也。故若拙，大辯者不言，而辯者也。故若訥，如是無它，凡以有本，故也。

本者何也今夫寒熱者天地之所為有形之所不免也而一躁焉則可以勝寒一靜焉則可以勝熱以一時之躁靜猶可以勝天地之所行況夫體無為之清靜以為天下正則安往而不勝者乎故以言其成則若缺而不敞以言其盈則若沖而不窮其直若屈而伸其巧若拙而工其辯若訥而諭此之謂有本

息齋注

成與缺沖與盈直與屈巧與拙辯與訥皆物之形似者也惟道無名以形求之皆不可得故雖

成若缺雖盈若沖雖直若屈雖巧若拙雖辯若訥蓋其成不以形其盈不以器其直不以壯其巧不以心其辯不以口故世以形似求之皆不可得也蓋世之言道術未有不偏如躁勝寒而不可以勝熱靜勝熱而不可以勝寒要其各有所止也惟清靜無為雖不求勝物而天下之物莫能勝之故曰清靜為天下正

葉夢得注

寒暑者天地之氣也有人于此躁猶可以勝寒靜猶可以勝熱苟知其所勝孰往而不可

為則清勝濁靜勝動其効亦可見矣而况于缺之勝成  
冲之勝盈屈之勝直拙之勝巧訥之勝辯惟其不察此  
故必求其能勝之者苟求勝之  
終非其正也唯清靜為天下正

吳注

以成為成以盈為盈以直為直以巧為巧以辯為  
辯小矣若缺則非成若冲則非盈若屈則非直若  
拙則非巧若訥則非辯乃為成之大  
盈之大直之大巧之大辯之大者也

天下有道卻走馬以糞天下無道戎馬生于郊罪莫大  
于可欲禍莫大于不知足咎莫大于欲得故知足之足

常足矣

卻屏去也糞糞田也吳幼清本糞下有車字以  
張衡東京賦卻走馬以糞車為證戎馬戰馬也

郊交也二國相交之境也戎馬生于郊言兵久不還也  
一性之內無欠無餘人能安之無往不足故曰知足之

足常

希聲注

夫天下有道之世雖有甲兵無所用雖有健馬無所乘天下無道之時天子則外攘四夷諸侯

則外侵鄰國故兵甲動于境內戎馬馳于四郊桑梓盡于樵薪荆棘生于隴畝矣夫無道之君毒痛天下原其所以其惡有三心見可欲非理而求故罪莫大焉求而不已必害於人故禍莫大焉欲而必得其心愈熾故咎莫重焉然自非聖人不能無欲欲則不能無求求而不知足禍之甚者也嗟乎凡非真性皆外物也夫焉得而有之人皆有至足者能知至足之足則無所不足矣

蘇注

天下各安其分則不爭而自治故卸走馬而糞田以其可欲者示人固有罪矣而不足其足者其禍

又甚所欲必得者其咎最大匹夫有一于身患必及之戾王而為是則戎馬之所自起也唯知足者所寓而足

故無  
不足

呂注

天下有道民之智能已于耕食之間而盜爭銷于無欲之際而其死已脫矣故曰節走馬以糞天下

無道見可欲以為造兵之本雖有封疆之界不能定也故曰戎馬生于郊然則罪之所由生者何耶可欲而已矣故曰罪莫大于可欲由可欲故不知足則雖有餘而不止也平為福有餘為禍故曰禍莫大于不知足由不知足故曰欲得欲而得之則怨咎之招而兵之所以不知也故曰咎莫大于欲得故不知足者雖足而不足則知足之足常足也可知矣

息齋注

天下有道則能使兵為民天下無道則能使民為兵人能知道則能使色為空人不知道則能

使空成色可欲者愛也不知足者取也欲得者有也由愛生取由取生有衆有橫生遂為無窮之咎若知取不

必外是謂知足  
足則無不足矣

不出戶知天下不窺牖見天道其出彌遠其知彌少是  
以聖人不行而知不見而名不為而成

蘇注

性之為體充遍宇宙無遠近古今之異古之聖人  
其所以不出戶牖而無所不知者持其性全故耳  
世之人為物所蔽性分于耳目內為身心之所紛亂外  
為山河之所障塞見不出視聞不出聽戶牖之微能蔽  
而絕之不知聖人復性而足乃欲出而求之是以彌遠  
而彌少也性之所及非特能知名而已蓋可以因物  
之自然不勞  
而成之矣

呂注

天下之所以為天下者果何邪見天下之所以為  
天下則不出戶而知之矣天道之所以為天道者



果何邪見天道之所以為天道則不窺牖而見之矣今夫天下之大固無窮也必待出而後知之則足力之所及者寡矣所知者幾何哉天道之遠固不測也必待窺而後見之則目力之所及者寡矣所見者幾何哉故曰其出彌遠其知彌少是以聖人知天下之所以為天下故不行而知見天道之所以為天道故不見而名夫何故以其備于我故也知之于所不行名之于所不見則不為而成矣

### 章安注

出戶而知其所以窺牖而見其所可見爾天下之大天道之廣豈可以知見

乎出戶則離此而有所知其知能幾也窺牖則即彼而有所見其見豈遠也聖人密運獨化不以知知故無所不知不以見見故無所不見天下者物之所在使然者也天道者道之所在自然者也其粗在物其妙在道皆不離當體而盡夫知見何事于出何待于窺出戶則有行窺牖則有見聖人不行而本乎智不見而本乎心故

天下之事皆可得而知天道之妙皆可得而名能知名故不為而成其所自成也

息齋注

出而求天地者求其形也天地不可以形盡而可理盡故其出彌遠其知彌少若知其理之在

此則雖閉戶可也聖人知不在形故不必行名不在色故不必見成不在事故不必為

為學日益為道日損損之又損之以至于無為無為而無不為矣故取天下常以無事及其有事不足以取天

下

取開元疏云猶攝化也無事即無為也無為自化清靜自正故曰取天下常以無事為者敗之執者失之

故曰有事不足以取天下

羅什注

損之者無羸而不道遺之至乎忘慈然後無細而不去去之至乎忘善慈者非也善者是也既

損其非又損其是故曰損之又損是非俱忘情欲既斷  
德與道合至于無為己雖無為任萬物之自為故無不  
也為

**蘇注**

不知道而務學聞見日多而無以一之未免為累  
也孔子曰多聞擇其善者而從之多見而識之知

之次也苟一日知道顧視萬物無一非妄去妄以求復  
性是謂之損孔子謂子貢曰女以予為多學而識之者  
與曰然非與曰非也予一以貫之去妄以求復性可謂  
損矣而去妄之心猶存及其兼忘此心純性而無餘然  
後無所不為而不失于無為矣人皆有欲取天下之心  
故造事而求之心見于外而物惡之故終不可得聖人  
無為故無事其心見于外而物安  
之雖不取天下而天下歸之矣

**呂注**

為學者未聞道者也未聞道而求之則不得不博  
故日益為道者已聞道者也已聞道者而為之則

期至于無為而已故日損而損之者未免乎有為也并其損之者而損焉而後至于無為無為者無有而已無不為者乃所以無無也此之謂絕學無憂無憂之謂神也者物物而非物者也則取于天下也何有由此觀之取天下常以無事及其有事不足以取天下觀莊周之所以應帝王者而深求之則可知已

### 黃茂材注

無所不知而後可以言道故道欲日損然益者可已化然後可以言道故道欲日損然益者可已進損者不可彊損而未兼忘其損未為損也直須管地脫落前後際斷乃至無為之地故能無所不為而應用不窮抱于天下綽綽然矣

### 息齋注

為學所以求知故日益為道所以去妄故日損知不極則損不全故日益者所以為日損也若損之又損妄去真全則無為矣至于無為則凡有為未嘗不無此又未易以損益論也及其無為之至雖取天

下而有之尚猶不見其事若以有事取之取一物尚不可得而況于取天下乎

聖人無常心以百姓心為心善者吾善之不善者吾亦善之德善矣信者吾信之不信者吾亦信之德信矣聖人在天下慄慄為天下渾其心百姓皆注其耳目聖人

皆孩之

無常心心無所主也慄園協反為去聲渾胡本反

蘇注

虛空無形因萬物之形以為形在方為方在圓為圓如使空自有形則何以形萬物哉是以聖人無

心因百姓之心以為心無善不善皆善之無信不信皆信之善不善在彼吾之所以善之者未嘗渝也可謂德善矣信不信在彼而吾之所以信者未嘗變也可謂德信矣不然善善而棄不善信信而棄不信豈所謂常善

欽定四庫全書

卷二

救人故無棄人哉天下善惡信偽方各自是以相非相  
賊不知所定聖人憂之故慄慄為天下渾其心無善惡  
無信偽皆以一待之彼方注其耳目以觀聖人之予奪  
而吾一以嬰兒遇之于善無所喜于惡無所嫉夫是以  
善者不矜惡者不慍釋  
然皆化而天下始定矣

呂注

人心其神矣乎操則存舍則亡出入無時莫知其  
鄉操存舍亡則無常體之可測出入無時則非今  
昔之可求莫知其鄉則非方所之可得神則若是人心  
亦然聖人先得我心之盡者也故無常心而以百姓心  
為心猶之鑑也無常形以所應之形為形而已聖人之  
視己心也如此則其視百姓心亦若是而已則善不善  
信不信亦何常之有哉故善者吾善之不善者吾亦善  
之知其心之善不善無常而以德善之故也信者吾信  
之不信者吾亦信之知其心之信不信亦無常而以德  
信之故也物得以生之謂德形體保神各有儀則之謂

性性修反德德至同于初則德者性之所自出而無不善不信明矣聖人之任天下慄慄然不已為百姓渾其心渾其心也者使善信者不以自異而不善不信者不自棄故也百姓皆注其耳目唯聖人之為視聽而聖人皆孩之孩之也者遇之以慈待之以厚雖有不善不信猶善而信之知其心之無常猶已而已矣

元澤注

善惡生乎妄見妄見生乎自私公于大道則雖目覩善惡而心無殊想矣故聖人因世之情強

立毀譽而心知善惡本非其實故不善之善非憐而恕之乃不覺有異也忘善惡之實真善也是以萬法雖殊等為實相信與不信混為一體知一切相無非妄者故能視不善猶善知一切相無非實者故能視不信猶信當妄知實當實知妄此聖智所以異于衆人也

息齋注

甚夫心之為天下害也莊子曰賊莫大於德有心而心有眼蓋心之為物潛天而天潛地而地

無遠不至而世人但以分別為心分別心生妄有所見  
遂喪其全此莊周所以謂之賊也聖人之心常與道俱  
道無所不在吾心亦無所不在故無常心及其出而應  
世知其相從于妄故取捨之心未嘗生也善吾從而善  
不善亦吾從而善于天下無不善是謂德善信吾從而  
信不信亦吾從而信于天下無不信是謂德信怵怵然  
常恐天下之人德有心而心有眼穿鑿取與不見大全  
故每為天下渾其心百姓用耳目所接者為明而不知  
其非明也聖人皆孩而畜之使不為非明  
所亂然則非明者豈擇此所謂無明者歟

宏甫注

百姓有善不善而聖人皆善之百姓有信不信  
而聖人皆信之夫聖人曷嘗有善信之心哉一  
以百姓之心為善信故也是謂同德之善而非一人之  
善同德之信而非一己之信故曰德善德信也夫天下  
之人各一其心也久矣聖人則合天下之人而渾為一  
心百姓皆注其耳目以我觀彼以此視我各相是非不



可一也。聖人見此，不喜聞彼，不怒一以嬰兒遇之。是以彼亦不矜此，亦不愠釋，然皆化而天下定矣。聖人無常心，以百姓之心為心也。如此此太。上治世之大旨，所以能無為者哉。

出生入死，生之徒十有三，死之徒十有三，人之生動之死地者，亦十有三。夫何故？以其生生之厚。蓋聞善攝生者，陸行不遇兕虎，入軍不避甲兵，兕無所投其角，虎無

所措其爪，兵無所容其刃，夫何故？以其無死地。

出謂自無而見

於有入謂自有而歸于無。莊子萬物皆出于機入于機。又曰其出不訢，其入不詎。又曰有乎出有乎入，皆以出為生，入為死。夫音符攝生如攝政，攝官之攝不認生為己，有如督焉管攝之也。不期而會曰遇。兕音似山海經

兕出湘水之南蒼黑色兩雅  
云形如野牛一角重千斤

**蘇注**

性無生死出則為生入則為死用物取精以自滋  
養者生之徒也聲色臭味以自戕賊者死之徒也

二者既分生死之道矣吾又知作而不知休知言而不知默知思而不知忘以趣于盡則所謂動而之死地者也  
也生死之道以十言之三者各居其三矣豈非生死之道九而不生不死之道一而已矣不生不死則易所謂寂然不動者也老子言其九不言其一使人自得之以寄無思無為之妙也有生則有死故生之徒即死之徒也人之所賴于生者厚則死之道常十九聖人常在不生不死中生地且無焉有死地哉

**呂注**

生者死之徒死者生之始則生死相為出入而已矣生之徒十有三則由生而得生非幸生者也死

之徒十有三則由死而得死非不幸而死者也民之生動之死地十有三則豹養其內而虎食其外穀養其外

而病攻其內非不以生為事顧不得其道而動之死地者也夫何故以其生生之厚蓋由生得生由死得死者固不必論而以生為事而反之死地其失為在此也蓋聞善攝生者陸行不遇兕虎入軍不被甲兵兕無所投其角虎無所指其爪兵無所容其刃夫何故以其無死地焉老子之于此固已體之而言蓋以疑之言聞以簡之何也此莊周所謂重言耶嘗試論之人之所以遇虎兕被甲兵而虎兕甲兵之所以能傷人者以吾有身故也今我視吾心莫知其鄉則吾心不可得吾心不可得則吾身與物亦不可得內不見有身外不見有物則孰為死地孰為虎兕甲兵而投其角措其爪容其刃哉然則善攝生者夫何以加此

元澤注

至人不知死不知生故亦莫能死亦莫能生故曰未嘗死未嘗生也彼偏乎陰陽而與生死為

徒者及徇欲為咎動之死地者凡是三類所見則殊而原其所以迷入道之至正而不免于生死者由妄有其

生而矜生過厚故耳或曰彼為道而至于枯槁者宜生  
生之厚乎曰吾之所以為我不死不生湛爾常一唯當  
息妄而彼乃執其所見更為枯槁故雖志趨空寂而不  
知其為有我之尤者也無死地者由其無生彼無生者  
湛然常生而不自生故未嘗死未嘗生道至于此則雖  
其形有禪而神未嘗變安得死乎此中國之神聖而西  
方之佛也若然者變化無常水火不能焦濡所撻不能  
創病乘虛觸實住無不通則物欲有之而不得況能傷  
之哉或曰然則何以謂之攝生曰降此一等便為死生  
所有故攝生必至于此然後生常存也是此于含德之  
厚者又為至矣

筆乘

生之徒十有三此練形住世者也死之徒十有三  
此殉欲忘生者也人之生動之死地十有三此斷

滅種性者也凡此十分之中率居其九皆生生之厚者  
也夫有生必有死是生固死之地矣兜虎甲兵將安避

之善攝生則無生矣故兕之角無所投虎之爪無所措  
兵之刃無所容何者彼無地以受之也厚生者九無生  
者一老子于十者之中闕一自擬其旨微矣然聖人無  
生非故薄之也本無生也昔人云愛生者可殺也愛潔  
者可汙也愛榮者可辱也愛完者可破也本無生孰殺  
之本無潔孰汙之本無榮孰辱之本無完孰破之知此  
者可以出入造  
化遊戲死生

### 程俱論

萬物之變莫大乎死生人之為道超然于死生  
之際則無餘事耳生果來乎死果往乎以生為

實來則吾之所從來者宜可知矣南北邪東西邪上下  
邪審不可以言也而謂之實來可乎以死為實往則吾  
之所從往者宜可知矣心邪物邪人邪天邪審不可以  
言也而謂之實往可乎然則吾之生也前不知其所起  
後不知其所斷貫萬古而常存者湛然也然後曉  
然知我之未嘗生未嘗死也將以奚為死地哉

道生之德畜之物形之勢成之是以萬物莫不尊道而  
貴德道之尊德之貴夫莫之爵而常自然故道生之畜  
之長之育之亭之毒之養之覆之生而不有為而不恃

長而不宰是謂玄德

畜許六反夫音符長上聲下同

希聲注

夫物生而後畜畜而後形形而後成其所由生者道也其所以畜者德也形其材者事也成其

用者勢也萬物以能生故尊道以能畜故貴德道德以生畜之故自然為萬物所仰宜有授之爵位而後見尊貴哉然道者真精之體德者妙物之用體可以兼用不可以兼體道可以體德德不可以兼道故稟其精謂之生含其炁謂之畜遂其形謂之長字其材謂之育權其成謂之亭量其用謂之毒保其和謂之養葢其傷謂

之覆此之謂大道既生之而不執有既為之而不矜恃  
既長之而不宰制此之謂立德營冕章言人同于道德  
今此章言道德同于是  
以其辭同而其理通也

**蘇注**

道者萬物之母故生萬物者道也及其運而為德  
救養羣衆而不辭故畜萬物者德也然而道德則

不能自形因物而後形見物則不能自成遠近相取剛  
柔相交積而為勢而後興亡治亂之變成矣形雖由物  
成雖由勢而非道不生非德不畜是以尊道而貴德尊  
如父兄貴如侯王道無位而德有名故也恃爵而後尊  
貴者非實  
尊貴也

**呂注**

萬物之生常本于無名之物而其畜常在于一而  
未形而物得以生之際無名者道也一而未形物

得以生者德也及其為物則特形之而已非其所以生  
且畜也已有形矣則裸者不得不裸鱗介羽毛者不得

不鱗介羽毛以至于幼壯老死不得不由勢之必然也故曰道生之德畜之物形之勢成之然則勢出于形形出于德德出于道道德本也形勢末也本尊而末卑本貴而末賤是以萬物莫不尊道而貴德道之尊德之貴夫莫之爵而常自然此其所以能以無為之柔弱而勝形勢之剛強則王侯之所以賓化萬物者在於此而不在彼也然則雖曰道主之德畜之物形之養成之至本而言之則生之畜之長之育之亭之毒之養之覆之莫非道也而道終無名焉故曰生而不有為而不恃長而不宰是謂玄德

元澤注

此四者皆道也以其各得其道故但為德為德則蓄之而已然畜之所以為德也及乎得其得

而成形則物而已矣物有其形則遠近相取剛柔相交各因其勢而成狀故德者道之分物者德之器勢者物之理明乎道德則形勢不足知而應酢無難矣命于天則為天子命于天子則為諸侯有所受命則出命者能



賤之矣唯道萬物之先而制其命孰能假之故常自然也

息齋注

物非道不生非德不畜自其有形以至於極長莫不以道德為主道之尊德之貴至於此極矣

然不自尊其尊不自貴其貴其施於物非有心于物也莫之命而常自然自然而生自然而畜凡所以長育成熟以至于養之履之莫非自然者由其自然故未嘗望物之報生不解勞施不求報是謂玄德

天下有始以為天下母既得其母以知其子既知其子復守其母歿身不殆塞其兌閉其門終身不勤開其兌濟其事終身不救見小曰明守柔曰強用其光復歸其明無遺身殃是謂襲常

兌口也人之有口家之有門皆喻物所從出者塞而閉之藏有

於無守母者也。參同契云：耳目已之竇閉，固勿發揚。兌口勿以談希之順，以洪即此義。不可目窺。曰：小不可力得。曰：柔遺唯季反，襲常猶前言襲明。密而不露也。記曰：拊而充，衰曰襲。

**蘇注**

無名天地之始，有名萬物之母。道方無名，則物之所資始也。及其有名，則物之所資生也。故謂之始。

又謂之母，其子則萬物也。聖人體道以周物，譬如以物知其子，了然無不察也。雖其智能周之，然而未嘗以物忘道。故終守其母也。天下皆具此道，然常患忘道而徇物。目悅于色，耳悅于聲，聞其悅之之心，而以其事濟之。是以終身而陷溺，不能救。夫聖人之所以終身不勤者，唯塞而閉之，未嘗出而徇之也。悅之為害，始小而浸大。知小之將大而閉之，可謂明矣。趨其所悅而不顧，自以為強而非強也。唯見悅而知畏之者，可謂強矣。世人開其所悅，以身徇物，往而不反。聖人塞而閉之，非絕物也。以神應物，用其光而已，身不與也。夫耳之能聽，目之能

見鼻之能嗅口之能嘗身之能觸心之能思皆所謂光也蓋光與物接物有去而明無損是以應萬變而不窮殃不及于其身故其常性湛然相襲而不絕矣

呂注

天下有始以為天下母則經所謂吾不知其名字之道者是也無名天地之始有名萬物之母道

常無名而為天下母何也蓋有名徒為萬物母而未足為天下母無名天地之始則自天而下皆生于無名故曰天下有始以為天下母也聞道易得道難得道易守道難今我既得其母以與心契矣非特聞之而已也則知天下之物皆我之所出也知天下之物皆我之所出而我常守之而不失則天下孰能以其所出而害其所自出哉此其所以歿身不殆也塞其兌閉其門終身不劫此則守其母之謂也心動于內而吾縱焉是之謂有兌有兌則心出而交物我則塞其兌而不通不通則心不出矣物引于外而吾納焉是之謂有門有門則物入

而撥心我則閉其門而不納不納則物不入矣內不出外不入雖萬物之變芸芸于前各歸其根而不知矣夫何勤之有哉古之人有能廢心而用形者以此道也若開其兌而不塞濟其事而不損則我之心直為物之逆旅莫適守者何恃而不止哉此所以終身不救也夫惟守其母者每見其心於動之微則寂然不動矣寂然不動感而遂通天下之故故曰守柔曰強既用其光以照其動而物莫之能勝也故曰守柔曰強既用其光以照其動之微復歸其明以反于寂然也則未嘗開兌濟事以至于不救何殃之有哉如是則襲于知和而深不可見矣故曰用其光復歸其明無遺身殃是謂襲常

**息齋注**

道為物母物為道子古之得道者能使子母不離而道物為一蓋物從道出物不異道子從母

出子不異母物不異道而世欲棄物以求道子不異母而世欲棄子而求母本不異而自異之是以終不得而

一也使人知物即道子即母知之守之則左右逢其原  
有不難者凡物不自道而用物以遺道者以人開其兌  
也兌者突也兌其突以濟其欲心蕩而精衰則物隨而  
喪必閉其兌塞其門神不外出從元自歸自然子母不  
離道與物一矣古之至人保其身而身存者用此道也  
人之患在于不謹其小不養其微若自小而謹之自微  
而養之雖小必明雖微必強故曰見小曰明知柔曰強  
明者本也光者明之所自出也元明為本其末分而為  
視為聽為覺為觸者皆其光也道自本流于末學自末  
求其本故曰用其光復其明是謂襲常即本明尤自  
明而光今以光歸  
其明故曰襲常

使我介然有知行于大道惟施是畏大道甚夷而民好  
徑朝甚除田甚蕪倉甚虛服文采帶利劔厭飲食資貨

有餘是謂盜芋非道哉

介然有知猶言微有知也夸張曰苑畜之反也夷平也路狹而

捷為徑除治也傳曰真除先人之敝廬是也青赤為文色絲為采傳奕云米是古文繡字資貨一作財貨盜芋

誤作盜夸今從韓非本

韓非解

朝甚除也者獄訟繁也獄訟繁則田荒田荒則府倉虛府倉虛則國貧國貧而民俗淫侈民俗

淫侈則衣食之業絕衣食之業絕則民不得無飾巧詐則知采文知采文之謂服文采獄訟繁倉庫虛而有以淫侈為俗則國之傷也若以利劔刺之故曰帶利劔諸夫飾智故以至於傷國者其私家必富私家必富故曰資貨有餘國有如是者則愚民不得無術而效之效之則小盜生由是觀之大姦作則小盜隨大姦唱則小盜和芋也者五聲之長者也故芋先則鍾瑟皆隨芋唱則諸樂皆和今大姦作則俗之民唱俗之民唱則

小盜必和故服文采帶利劔厭飲  
食而資貨有餘者是之謂盜芋矣

希聲注

老氏言若吾儂然略無知道之心始欲希於當  
世則唯所行之為務務其苟合於當世也使我

介然微有知常之明方將行于大道則唯所施而是畏  
畏其不合於大道也夫大道之云猶亨衡也亨衡平易  
無往不達以其大直不惠小迂而世人欲速由于捷徑  
是以崎嶇迷惑不達所趨故聖人病之慎所施教畏其  
導民於邪路終不合于大道焉噫入其國其政教可知  
也觀朝闕甚修除墻宇甚雕峻則知其君好土木之功  
多嬉遊之娛矣觀田野甚荒蕪則知其君好力役奪民  
時矣觀倉廩甚空虛則知其君好末作廢本業矣觀衣  
服多文彩則知其君好淫巧盡女工矣觀佩帶皆利劔  
則知其君好武勇生國患矣觀飲食常饜飫則知其君  
好醉飽忘民事矣觀資貨常有餘則知其君好聚斂困  
民財矣凡此數者皆盜用民力以為夸毗故謂之盜夸

盜夸者非有道之治也然則盜用之云陰取之而民不知也所謂唯施是畏其在此乎

**蘇注**

體道者無知無行無所施設而物自化今介然有知而行于大道則有施設建立非其自然有足畏

者矣大道夷易無有險阻世之不知者以為迂遠而好徑以求捷故凡舍其自然而有所施設者皆欲速者也

俗人昭昭我獨若昏俗人察察我獨悶悶  
宜復飾末廢本以施設為事夸以誨盜哉

**呂注**

君子之于道不可以不刳心心刳而無餘雖萬變陳于前而不足以撓吾之靜夫何施而畏哉使我

不能刳心而有介然之知行于大道則唯施是畏求其周行不殆不可得也况夫開其兌濟其事者耶大道之為體不知而知則夷之甚者也而民乃欲以有知求是好徑而不知所由也人之生以食為本而食必出于田田治而倉實倉實而食足食足而財豐財豐而廷治以知其本之所自出故也今以介然有知之心而行于



大道則已不得其母不得其母則其子非吾有也非吾有而取之猶之酒掃其庭內蕪其田虛其倉而服文采帶利劔厭飲食資財有餘亦非其有而取之矣非盜夸無以為也豈道也哉

**息齋注**

道不在知知者邪思也真道必明明而非知知不可及故施之不盡用之不窮使我介然以有

知之心而行大道所知有限而適無窮怵怵然恐其施之不足是謂惟施是畏蓋大道甚夷而民好徑好徑者知之為賊也使行于無知則凡所見聞無非道者豈不蕩然廣大心逸日休哉後世不然朝甚除除者治也除治其朝廷則外飾者至矣田甚蕪則心不治倉甚虛則行不修方且服文采以眩人帶利劔以威衆積飲食財貨而無所用之是謂盜夸如此則去道遠矣

善建者不拔善抱者不脫子孫祭祀不輟修之于身其

德乃真修之于家其德乃餘修之于鄉其德乃長修之  
于邦其德乃豐修之于天下其德乃普故以身觀身以  
家觀家以鄉觀鄉以邦觀邦以天下觀天下吾何以知

天下之然哉以此

之邦一作國漢人避高帝諱改  
於韻不叶今從韓非本

蘇注

世宜有建而不拔抱而不脫者乎唯聖人知性之  
真審物之妄捐物而修身其德充積實無所立而

其建有不可拔者實無所執而其抱有不可脫者故至  
其子孫猶以祭祀不輟也身既修推其餘以及外雖至  
于治天下可也天地外者世俗所不見矣然其理可推  
而知也修身之至以身觀身以家觀家以鄉觀鄉以國  
觀國皆吾之所及知也然安知聖人以天下觀天下亦  
若吾之以身觀身乎豈身可以身觀而天下獨不可以

天下觀乎故曰吾何以知天下之然哉以此言亦以身知之耳

呂注

凡物以建而立者未有不拔者也唯為道者建之

有不脫者也唯為道者抱神以靜則善抱而不脫矣夫  
唯所建所抱者如此則其傳豈有窮哉此子孫所以祭  
祀不輟也世之所謂修德者或修之于天下國家而不  
知其本真乃在吾身也故曰修之身其德乃真或修諸  
其身而不能推之于天下國家者故曰修之家其德乃  
除修之鄉其德乃長修之國其德乃豐修之天下其德  
乃普也莊周以為道之真以治身其緒餘以為國家其  
土直以治天下其說出于此也然則何觀而修之身哉  
以身觀身而已矣何謂以身觀身今吾觀吾身之所有  
何自也則知吾身之所謂自而有矣又觀吾身之所以觀  
者何自也則知吾觀之所自而觀夫既知吾身之所自  
而有又知吾觀之所自而觀則所以修之身者已足而

無待于外也。以家觀家，以國觀國，以天下觀天下，亦若是而已矣。古之所以藏天下于天下者，用是道也。

含德之厚，比于赤子。毒蟲不螫，猛獸不據，攫鳥不搏，骨  
弱筋柔而握固。未知牝牡之合而蛟作精之至也。終日  
號而不嗻，和之至也。知和曰常，知常曰明。益生曰祥，心  
使氣曰強，物壯則老，謂之不道，不道早已。

毒蟲蜂蠆之類，以尾端肆

毒曰螫，猛獸虎豹之類，以爪按拏曰據，攫鳥鵬鷃之類，以羽距擊觸曰搏。趙志堅曰：以四指握拇，指為握固。蛟子垂反，說文云：赤子陰也。號，平聲。嗻，所嫁反，聲嘶也。又啼，極無聲曰嗻，一作噓。不嗻，黃茂材云：古本無噓字。噓，不嗻。莊子之文，後人增入之，祥凶吉之候也。

蘇注

老子之言道德每以嬰兒況之者皆言其體而已未及其用也夫嬰兒泊然無欲其體則至矣然而已

物來而不知應故未可以言用也道無形體物莫得而見也況可得而傷之乎人之所以至于有形者由其有心也故有心而後有形有敵敵立而傷之者至矣無心之人物無與敵者而曷由傷之夫赤子所以至此者唯無心也無執而自握無欲而自作是以知其精有餘而非心也心動則氣傷氣傷則號而啞終日號而不啞是以知其心不動而氣和也和者不以外傷內也復命曰常遇物而知反其本者也知和曰常得本以應萬物者也其實一道也故昏謂之常生不可益而欲益之則非其正矣氣惡妄作而又以心使之則強梁甚矣益生使氣不能聽其自然日入于剛強而老從之則失其赤子之性矣

呂注

人之初生其德性至厚也此其長也耳目交于外心識受于內而益生日益多則其厚者薄矣為道

者指其所益生性修反德德至同于初故曰含德之厚  
比于赤子夫赤子之為物持以其受冲氣之和積而未  
散而猶毒蟲不螫猛獸不據攫鳥不搏況夫充純氣之  
守通乎物之所造而其和大于物者夫孰能害之魏  
文侯之間卜商是也蓋唯精為能致和何以言之今夫  
赤子不知所取而握固不知所與而峻作則精也使赤  
子也介然有取與之知則不一而粗矣其能如是乎故  
曰骨弱筋柔而握固未知牝牡之合而峻作精之至無  
所憂愠故雖終日號而嗑不頃則和也使赤子也有所  
憂愠則氣疾而不和其能若是乎故曰終日號而嗑不  
頃和之至夫形全精復與天為一精而又精反以相天  
精而至于相天則其充冲氣之和以生大同于物不足  
異也故致道之極則至于復命復命曰常含德之厚則  
至于知和知和亦曰常則道德雖有間及其會于常則  
同也知常則常固其自然而不益生動不知所為行不  
知所之身若槁木之枝而心若死灰奚以心使氣為哉

故益止則曰祥禍福無有則無人災祥者禍福兆于此而人災隨之矣心使氣則曰強強梁者死之徒夫致虛而守柔者道也道乃久沒身不殆致實而強則物而已物壯則老其道也哉故曰物壯則老是謂不道不道早已

知者不言言者不知塞其兌閉其門挫其銳解其紛和其光同其塵是謂玄同不可得而親不可得而踈不可得而利不可得而害不可得而貴不可得而賤故為天下貴

蘇注

道非言說亦不離言說然能知者未必言能言者未必知唯塞兌閉門以杜其外挫銳解紛和光同

塵以治其內者默然不同而與道同也可得而親則亦可得而疎可得而利則亦可得而害可得而貴則亦可得而賤體道者均覆萬物而孰為親疎等觀逆順而孰為利害不知榮辱而孰為貴賤情計之所不及此所以為天下貴也

呂注

知至于知常則知之至也知之至則默而成之而無不理也何所容心哉苟為不能無言則不能無

我雖知之非真知者也故曰知者不言言者不知塞其兌閉其門挫其銳解其紛和其光同其塵是謂玄同則默而成之之道也若然者萬物一府死生同狀無所甚親無所甚疎故不可得而親不可得而疎不就利不違害故不可得而利不可得而害不榮通不醜窮故不可得而貴不可得而賤夫可得而親疎利害貴賤者則貴在于物而物能賤之不可得而親疎利害貴賤者貴在于我而物不能賤也其為天下貴不亦宜乎然則知道



者固終不言故曰今以言言道則言非道也而知者乃以  
言為知則是知知夫斯言所以不得不出也以其言出于  
無言雖言猶不言也  
夫道豈默然也哉

**碧虛注**

君平曰五味在口五音在耳如甘非甘如苦非  
苦如商非商如羽非羽而易牙師曠能別之其

所以別之者口不能言也音味尚爾况妙道乎所以曰  
知者不言言者不知也塞兌閉門已見第五十二章然  
彼則約道清淨以塞者欲愛悅之端此則宗道無言故  
與損聰棄明之說夫道無形不可以目眈不可以口傳  
故心因焉不能知口辟焉不能議此至人不待收視緘  
口而自塞兌閉門也挫銳解紛和光同塵已見第四章  
然彼則就道以論功此則據人以明行至人與天同心  
而無知與道同身而無體則進銳紛亂之心於何而有  
光塵分別之意於何而生哉故至人之遊處顯則與萬  
物共其本晦則與虛無混其根語默隨時而不殊危言

日出而應變是以謂之玄同也

元澤注

不言者非密而不言誠無所事言何則不見一法故也不見一法故物物而不物于物况可得

而親疎貴賤之乎可得而親疎貴賤者物而已矣彼物物而不物于物故莫之爵而常貴也

息齋注

世之所有皆為夢境故知者不言知言之未盡也世之昧者以夢為實競競誦說終不離夢故

言不知由其見之未至也塞其兌謹其出也閉其門閉其入也挫其銳者治其內也解其紛者理其外也和其光者抑其在己也同其塵者隨其在物也無出無入無內無外無已無物是謂玄同既得其同謂之親而遠謂之疎而近謂之利而不喜謂之害而不懼謂之貴而不高謂之賤而不下凡物不足以名之故能為天下貴

以正治國以奇用兵以無事取天下吾何以知天下之

然哉天下多忌諱而民彌貧民多利器國家滋昏人多  
技巧奇物滋起法令滋章盜賊多有故聖人云我無為  
而民自化我好靜而民自正我無事而民自富我無欲  
而民自樸

蘇注

古之聖人柔遠能邇無意于用兵唯不得已然後  
有征伐之事故以治國為正以用兵為奇雖然此

亦未足以取天下天下神器不可為也為者敗之執者  
失之唯體道者廓然無事雖不取天下而天下歸之矣  
人主多忌諱下情不上達則民貧而無告利器權謀也  
明君在上常使民無知無欲民多權謀則其上眩而昏  
夫人不務本業而趨末技則非常無益之物作矣患人  
之詐偽而多為法令以勝之民無所措手足則日入于

盜賊  
矣

呂注

國容不入軍軍容不入國其來久矣則其所以治國用兵者固不同也治國者不可以不常且久者

也故以正而不以奇正者所以常且久也兵者不祥之器非君子之器故有道者不處兵而常且久則是處之也故以奇而不以正故不以奇者應一時之變者也以奇故不能不以奇而為以正故不以奇治國國之禍也以奇故無所事智則有事之不可以取天下也明矣故曰以正治國以奇用兵以無事取天下何以知無事之足以取天下哉以有事不足以取天下而不知之也夫唯為不出于無為而至于有事則天下多忌諱以避其所惡則失業者眾而民彌貧人多利器以趨其所好則下難知而國家滋昏民彌貪而多利巧國家滋昏而奇物滋起此法今所以滋彰而盜賊多有也法禁于法之所加而不能禁于法之所不加令行于令之所聽而不能行于令之

所不聽民貧而多利巧則令有所不聽矣國家昏而奇  
物滋起則法有所不加矣此所以滋彰而盜賊多有也  
若然者凡以有事取天下之過也故聖人云我無為而  
民自化我好靜而民自正我無事而民自富我無欲而  
民自樸此則取天下常以無事之證也蓋其失之也由  
有事故天下多忌諱而民彌貧人多利器而國家滋昏  
惟其如此故民多利巧奇物滋起法令滋彰盜賊多有  
也其復之也由無為故好靜無為故民自化而絕巧棄  
利奇物不起好靜故民自正而盜賊無有由無為好靜  
故無事而無欲以無事故民自富而無忌諱之貧以無  
欲故民自樸而無利  
器之昏其序然也

**息齋注**

我以正治人由人之本正也以奇用兵由兵之  
本奇也以無事取天下由天下之本無事也凡

我之應物者豈以我哉亦由物而已夫古之聖人能以  
天下為一身中國為一人者其治自心出也我多忌諱

則禁防必設禁防既設則民安得而不貧我以利示民  
則民多趨利民既趨利則國安得而不昏我以巧示民  
則民多伎巧伎巧既勝則奇物安得不滋我以法治民  
則民亦竊法以自便上下相冒則盜賊安得而不多聖  
人示以無為示以好靜示以無事示以無欲天下各以  
其所示者報之故曰德猶風也民猶草也草上之風必  
偃

其政悶悶其民淳淳其政察察其民缺缺禍兮福所倚  
福兮禍所伏孰知其極其無正邪正復為奇善復為祆  
人之迷也其日固久矣是以聖人方而不割廉而不剝  
直而不肆光而不耀

悶音門缺發缺也一作缺缺失望貌以其察察宜無不及故人望之

而卒失望也極終也奇衰也廉按也  
劇居衛反割也皆謂芒利傷物也

蘇注

天地之大世俗之見有所眩而不知也蓋福倚于禍禍伏于福譬如老稗生死之相繼未始有止而

迷者不知也夫惟聖人出于萬物之表而攬其終始得其大全而遺其小察視之悶悶若無所明而其民醇醇各全其性矣若夫世人不知道之全體以耳目之所知為至彼方且自以為福而不知道之伏于後方且自以為善而不知妖之起于中區區以察為明至于察甚傷物而不悟其非也可不哀哉知小察之不能盡物是雖能方能廉能直能光而不用其能恐其陷于一偏而不反也此則世俗所謂悶悶也

呂注

以正治國以無事取天下則其政悶悶悶者言其不以察為快也故其民淳淳淳者言其不謀

于薄也以智治國以有事為天下則其政察察察者反悶悶者也故其民缺缺缺者言其不全于樸也淳

淳故安于德性而不為禍福奇正善祚之所遷是不潔  
于薄也。缺于缺故避禍而未必免求福而未必得以為正  
也。而有時乎為奇以善也而有時乎為祚而禍福奇  
正善祚未知孰在也。徒令智多而難治是不全于樸也。  
何則時有終始世有變化禍福淳淳至有所拂者有所  
宜有所拂者世所謂禍而有所宜則福所倚也。有所宜  
者世所謂福而有所拂則禍所伏也。則孰知其極而避  
就之耶。自殉珠而有所正者有所差則所謂正者果未  
可知也。今為正者後或為奇此為奇者彼或為正善與  
祚亦然。則天下之禍福正奇善祚果未可定也。民自有  
知以來迷而執之其日久矣。奈何重之以察察之政。而  
使之不得反撲而全乎。是以聖人方而不割。故不以一  
人斷制利天下廉而不刺。故勝物而不傷。直而不肆。故  
能曲全而枉直光而不耀。故用其光復歸其明。此無它  
取此闕闕而去  
彼察察故也



息齋注

其政悶悶若無求于民而民不以巧應上故其民醇醇察察若有得于已而民以巧求免故其

民缺缺天下之事禍福之相為倚伏所從來久矣政悶悶者無得在我而有得在民政察察者有失在民而有得在我我得則彼失我福則彼禍自然之理也昧者不知理道之正專以察為明以求僥倖之福遂使正復化而為奇善復化而為祗人之迷其日久矣是以聖人方而不割廉而不剷直而不肆光而不耀賞罰刑政蓋有設而不用其極則能使奇者反而為正祗者變而為善故曰教化之行引中人而納于君子之域教化之廢引中人而陷于小人之途此不可不知也

農師注

其無正邪蓋有正者有正正者所謂正正者無正是也夫唯無正故能超乎吉凶之表而無禍

無福以知其極也若夫未能致于無正之地而流于吉凶之域則一禍一福其運如輪其循如環終于迷而已

故曰正復為奇善復為  
妖民之迷其日固久

治人事天莫若嗇夫惟嗇是謂早服早服謂之重積德  
重積德則無不克無不克則莫知其極莫知其極可以  
有國有國之母可以長久是謂深根固柢長生久視之

道

服一作復柢一作蒂花跌也

韓非解衆人之用神也靜靜則少費少費之謂嗇嗇之為術  
也生於道理夫能嗇也是從於道而服於理者也衆人  
離於患陷於禍猶未知退而不服從道理聖人雖未見  
患禍之形虛無服從於道理以稱蚤服故曰夫唯嗇是  
謂蚤服知治人者其思慮靜知事天者其孔竅虛思慮

靜故德不去孔竅虛則和氣日入夫能令故德不去  
新和氣日至者蚤服者也故曰蚤服是謂重積德

**蘇注**

凡物方則割廉則削直則肆光則耀唯聖人方而  
不割廉而不削直而不肆光而不耀此所謂嗇也

夫嗇者有而不用者也世患無以服人苟誠有而能嗇  
雖未嘗與物較而物知其非不能也則其服之早矣物  
既已服斂藏其用至于殒身而終不試則德重積矣德  
積既厚雖天下之剛強無不能克則物莫測其量矣如  
此而後可以有國彼世之小人有尺寸之柄而輕用之  
一試不暇天下測知其深淺而爭犯之雖欲保其國家  
不可得也吾是以知嗇之可以有國可以有事以有國  
之母也孟子曰存其心養其性所以事天也以嗇治人  
則可以有國者是也以嗇事天則深根固蒂者是也古  
之聖人保其性命之常不以外事天則深根固蒂者是也古  
帶固而不可脫雖以長生久視可也蓋治  
人事天雖有內外之異而莫若嗇則一也

呂注

而治人而不以人之所以為人者治之則人不可得而治夫事天而不以天之所以為天者事之則天

不可得而事矣精神四達並流而無所不極化育萬物其名為同帝則人之所以為人而天之所以為天者也純素之道唯神是守守而勿失與神為一則人其有不可得而治天其有不可得而事者乎故曰治人事天莫如嗇也夫唯嗇其精神而不用則早復者也苟為不嗇而費之至于神敝精勞雖欲反其精神亦無由入矣其於復也不亦晚乎故曰夫唯嗇是謂早復人之生也固足于德夫誠能嗇而早復之則德日益以充故曰早復謂之重積德重積德則德之至者也至德者火不能熱水不能溺寒暑不能害而禽獸不能滅則安往而不克哉故曰重積德則無不克夫有所不克則其道有時而極也無所不克則孰知其極哉故曰無不克則其知其故能物物莫知其極則不物而能物物者不可以物物而不物

無其累矣故曰莫知其極可以有國既得其母以知其子既知其子復守其母殒身不殆故曰有國之母可以長久然則畜之為道是謂深根固蒂生長久視之道也精神者生之根畜而藏之則根深而生長矣長生者視之蒂衛而保之則蒂固而視久矣

息齋注

外以治人內以事天皆莫若畜畜者無所不畜之謂也謹于內閑於外內心不馳外心不起之

謂畜故能早服內服其心外服其形寂然不動則德有所積積于不積則無不勝無不勝則無不治雖有國猶可也人知其可以有國而不知其可以有國者由其有本也本積既厚則其塵垢糠粃猶將陶鑄堯舜况其下者哉此所謂深根固蒂治人事天之道

治大國若烹小鮮以道蒞天下其鬼不神非其鬼不神

其神不傷人非其神不傷人聖人亦不傷之夫兩不相

傷故德交歸焉

莊力至反聖人亦不傷之一作傷人以  
下德交歸焉觀之作之為是之指神而

言也

韓非解

工人數變業則夫其功作者數搖徙則亡其功  
一人之作日亡半日十日則亡五人之功矣然則數變

人之作日亡半日十日則亡五萬人之功矣然則數變  
業者其人彌眾其虧彌大矣凡法令更則利害易利害  
易則民務變務變之謂變業故以理觀之事大衆而數  
搖之則少成功藏大器而數徙之則多敗傷烹小鮮而  
數撓之則賊其澤治大國而數變法則民苦之是以有  
道之君貴靜不重變法故曰治大國者若烹小鮮人處  
疾則貴醫有禍則畏鬼聖人在上則民少欲民少欲則  
血氣治而舉動理舉動理則少禍害夫內無瘕疽痺痔

之害而外無刑罰法誅之禍者其輕恬鬼也甚故曰以道蒞天下其鬼不神治世之民不與鬼神相害也故曰非其鬼不傷人也其神不傷人也鬼崇也疾人之謂鬼傷人人逐除之之謂人傷鬼也民犯法令之謂民傷上上刑戮民之謂上傷民民不犯法則上亦不行刑上不刑之謂上不傷人故曰聖人亦不傷民上不與民相害而人不與鬼相傷故曰兩不相傷民不犯法則上不刑而人不與鬼相傷其產業上內不用刑罰而外不積其產業則民蕃息民蕃息而畜積盛民蕃息而畜積盛之謂有德凡所謂崇者鬼鬼去精神亂精神亂則無德鬼不崇人則冤鬼不去冤鬼不去則精神不亂精神不亂之謂有德上威畜積而鬼不亂其精神則德盡在于民矣故曰兩不相傷則德交歸焉言其德上下交感而俱歸于民也

蘇注

烹小鮮者不可撓治大國者不可煩煩則人勞撓則魚爛聖人無為使人各安其自然外無所煩內

無所畏則物莫能侵雖鬼無所用其神夫非其鬼之不  
神亦有神而不傷人耳非神之不傷人聖人未嘗傷人  
故其鬼無能為耳人鬼所以不相  
傷者由上有聖人也故德交歸之

**呂注**

得有國之母以治國雖大無難也烹魚者不可以  
煩而烹小鮮者尤當全之而不割者也治大國者

亦若是而已烹而割之則傷矣以道蒞天下者謂之大  
制亦不到以傷之而已及其至也則其鬼不神凡以不  
傷之所致也何以言之鬼之為道非不神也厥與人雜  
擾而見其神則不能不傷人而所以不神者以聖人為  
能以道蒞天下使人不淫其性不違其德無大喜大怒  
以于陰陽之和所謂處混茫之中與一世而得潛漢焉  
者也則是聖人亦不傷人也唯聖人為能不傷人故陰  
陽和靜鬼神不擾萬物不傷羣生不夭則其神不傷人  
也神不傷人則無以見其靈響而神焉由此觀之其鬼  
不神非其鬼不神也由其神不傷人故不神也非其神



不傷人由聖人亦不傷人故其神不傷人也使聖人之于人不能全其樸而傷之而人失其性至于四時不至寒暑之和不成人之所以傷神者為多則神其能不傷人乎夫唯神不傷人則神歸德于人神不傷人而人亦歸德于神矣故曰夫兩不相傷故德交歸焉

### 息齋注

治國者聖人之餘事不啻如烹小鮮雖恢奇譎怪道通為一故其鬼不神非其鬼不神使鬼而有神凡恢奇譎怪皆化而為道道豈有傷人者乎本欲吾不傷人故其幽至于鬼神皆不能以神傷物大而政治幽而鬼神兩不傷故人鬼之心交歸焉非至德其能如是乎

### 程俱論

聖人不傷民固也而能使鬼神亦不傷人何哉蓋人之在道道之在人猶魚之在水水之在魚也亦何生死之辨乎方其以道蒞天下天下之民其生也泊焉所以善其生也其死也寂然所以善其死也寂

然而已。鬼安得而神乎？生也如彼，死也如此。尚安得有靈？響崇厲之為哉。

宏甫注

烹小鮮者撓之則爛。故聖人以無為治天下。雖有神，姦無所用之。非聖人能絕之，使不神也。雖

神而自不能為人之傷也。何也以聖人未嘗傷人也。夫聖人不傷人，神亦不能為人之傷。是兩不相傷也。但不傷則德歸焉。宜別有德以不傷之哉。夫德即陽之矣。

大國者下流天下之交，天下之北。北常以靜勝，牡以靜為下。故大國以下小國，則取小國；小國而下大國，則取大國。故或下以取，或下而取。大國不過欲兼畜人，小國不過欲入事人。夫兩者各得其所，欲故大者宜為下。

蘇注

天下之歸大國猶衆水之趨下流也衆動之赴靜猶衆高之赴下也大國能下則小國附之小國能

下則大國納之大國下以取人小國下而取于人

呂注

下知以道治其國固不傷其人矣而不知所以交天下者則已雖不傷人而有傷其人者矣大國者下

流天下之交天下之交北北常以靜勝壯以靜為下是乃所以交天下而保其人之道也蓋天下之交北而北居下流以致天下之交則北以靜為下而勝壯之道也故大國以下小國則取小國則所謂或下以取之也下以取之者言大之于小宜若可以無下而下之者以取之故也小國以下大國則取大國則所謂或下而取之者也下而取之者言小之于大不得不下而取之故也蓋大國不過欲兼畜人而小國不過欲入事人今大者下小小復下大兩者各得其所欲則其有不取之者乎

取之者言得其心而不失之謂也然則大者小者莫不為宜下而獨曰大者宜為下何也小而不能下大非徒不能取大國而亦災禍及之矣則不嫌于不宜故曰大者宜為下而已

**息齋注**

國大而能降以求物則物必交歸之牝以靜而下物故牝常勝牡以大國而下小國則必得小

國以小國而下大國則必得大國故大國或下小國以取小國或下大國而取者各獲其心之謂也故大國不過欲畜小國小國不過欲事大國夫如是而後兩者各得其所孟子曰以小事大者畏天者也是而後兩者各者也樂天者保天下畏天者保其國故大國尤宜為下

**吳注**

交會也大國者諸小國之交會如水之下流為天下眾水之交會也牝不先動以求牡牡常先動以

求牝動求者招損靜侯者受益故曰以靜勝牡動求者居上靜侯者居下故曰以靜為下或曰牝字其一疑衍

大國不恃其尊謙降以下小國則能致小國之樂附小國甘處于卑俯伏以下大國則能得大國之見容下以取謂大國能下以取小國之附下而取謂小國能下而取大國之容也大國下小國者欲兼畜小國而已小國下大國者欲入事大國而已兩者皆能下則大小各得其所欲然小者素在人下不患乎不能下大者非在人下或恐其不能下故曰大者宜為下章首下流之喻以喻大國非在人下而能下者北牡之喻以喻小國素在人下而能下者

### 林希逸注

大國不過欲兼畜乎人小國不過欲入事乎人二者皆非自下不可惟能自下則兩者皆

得其欲然則知道之大者常以謙下為宜矣此句乃一章之結語其意但謂強者須能弱有者須能無始為知道一書之意往往如此解者多以其說喻處作真實說以故失之獨黃茂材云此一篇全是惜物明道此言最

當但不能推  
之于他章耳

道者萬物之奧善人之寶不善人之所保美言可以市  
尊行可以加人人之不善何棄之有故立天子置三公  
雖有拱璧以先駟馬不如坐進此道古之所以貴此道  
者何不曰求以得有罪以免耶故為天下貴

行去聲先  
悉薦反

蘇注

凡物之見于外者皆其門堂也道之在物譬如其  
與物皆有之而人莫之見耳夫唯賢者得而有之

故曰善人之寶惡者雖不能有然而非道則不能安也  
故曰不善人之所保蓋道不遠人而人則遠之今誠有  
人美言之則可以為市于世尊行之則可以加于人矣  
朝為不義而夕聞大道妄盡而性復雖欲指其不善不

可得也而又安可棄之哉立天子置三公將以道救人耳雖有拱璧之貴駟馬之良而進之不如進此道之多也道本在我人患不求求則得之矣道無功罪人患不知知則凡罪不能汙也

### 呂注

萬物負陰而抱陽沖氣以為和則未有一物而不足于道者也室之有奧深邃燕間而尊者之所處也萬物莫不有深邃燕間尊者高之處則道是也故曰道者萬物之奧唯其如此故善人之賢而不善人之所保也何則善人知其善之所自出則得之而有無窮不費之富非其實耶不善人知其不善至于此而竝同則雖有萬惡渙然而釋夫非其所保耶夫言之美者可以市行之尊者可以加人則人無善不善固知美所美而尊所尊也有道者之于人猶天地也天無不覆地無不載非特美言尊行之比也則人之不善何棄之有故立天子置三公雖有拱璧以充駟馬所以享於上者禮之恭幣之重者也然不如坐進此道以道之為天下貴雖坐

而進之過于恭禮重幣也天子三公所以坐而論者不  
過此而已矣古之所以貴此道者何也不曰求以得有  
罪以免耶求以得則所謂善人之實有罪以免則所謂  
不善人之所保也唯其如此此所以為天下貴而古之  
所以不得  
不貴也

息齋注

與者藏也道為萬物之所貴如與之能藏物賢  
者以道為寶故樂得其得不賢者非道莫保故  
樂免其罪由其根于人心之自然無使之者故言依于  
道則其美可市行依于道則其尊可加于人苟非人心  
之自然則言而不從行而不應矣由人各根于道不幸  
而陷于不善則聖人亦何忍棄之故立天子置三公非  
苟利其富貴也蓋不欲違棄人於不善還以斯道善之  
而已使雖有拱璧以先駟馬不如出一善言建一善行  
使天下之人不失其善則其利豈小補哉由其以道覺  
民是謂坐進此道古之所以貴此道者何也以其善者



不日而得其善使不幸而至于不善則亦足以自免于惡此豈不足以為天下貴邪

**吳注**

萬物之與萬物之最貴者與室之西南隅寢廟之制有堂有室室在內故室為貴室中之制東南隅

曰突東北隅曰宦西北隅曰屋漏與尊者所居故與為貴道之尊貴猶寢廟堂室之與拱壁合拱之壁駟馬一乘之馬拱壁先駟馬猶春秋傳言乘車先十二牛也坐跪也朝聘之享駟馬陳于外執拱壁以將命曰先朝聘也以拱壁駟馬為至貴而未足貴也

**葉注**

夫婦之愚未有求道而不得一有聞焉雖向所嘗以為罪者可以一洗皆空則道之為貴果在此不

在彼也

為無為事無事味無味大小多少報怨以德圖難于其

易為大於其細天下難事必作於易天下大事必作於

細是以聖人終不為大故能成其大夫輕諾必寡信多

易必多難是以聖人猶難之故終無難

為營為也純甫云人皆有所為

聖人亦人耳獨無所為乎但眾人所為者有為之事聖人所為者無為之道此其所以異也事所為之條件也

味所為之理趣也作起也

**蘇注** 聖人為無為故無所不為事無事故無所不事味無味故無所不味其于大小多少一以道遇之而

已蓋人情之所不忘者怨也然及其愛惡之情忘則雖報怨猶報德也世人莫不畏大而侮小難多而易少至於難而後圖大而後為則事常不濟夫聖人齊大小一多無所不畏無所不難而安有不濟者哉

呂注

無事者其為常出於不為故為無為為無為故事者不可得則為出于不為矣有為則有事為而無為則事亦無事也非徒無事也雖味之而無味矣味之者反復尋繹之之謂也道之為物視之不見聽之不聞搏之不得雖反覆尋繹之復歸于無物而已矣唯其如此故可以大可以小可以多可以少多少舉在于我而所謂怨者固無常心則不善者吾亦善之德善不信者吾亦信之德信而昏報之以德夫人之所難忘者怨也而以德報之則它不足以累其心矣非徒然也而圓難于其易為大于其細以天下之難事必作于易天下之大事必作于細而我常無作也苟有所作必于易與細而見之則所謂知幾其神者是也能得之於吾心則其推之于天下國家無難矣是以聖人終不為大故能成其大以為大於其細而不為大於其大故也出諾易也復言難也不慎重于出諾之際則言難復矣易而圖之則易

也難而圖之則難矣不圖之于易圖之始而圖之於難則難矣此俗人之所以寡信而多難也是以聖人由難之故終無難以難之于其易而不難之于難也

息齋注

物為無為則已不勞事無事則人不煩味無味則物不費世所謂大小多少者以形言也聖人遊

於形器之外故大小多少等而為一夫大小多少尚等而一之又況於恩怨報施之間乎吾所為所施者惟德而已宜知其有所怨宜知其有所報者哉既無恩怨報施之別又無大小多少之異其于天下之故豈有心于為之哉事必求易大必由細自易而往則難者亦易自細而行則大者亦細是以聖人終不為大而大必歸之者由其無心也惟其無心於事故未嘗先事而期於物豈若世之小夫已未為而先諾事至而多易先諾則必寡信多易則必多難聖人于事未至則常若難之非難之也不以我必于物故若難之惟其難之故終無難

筆乘

夫事涉於形則有大小係乎數則有多少此怨所由起也惟道非形非數而聖人與之為一以無為

為為以無事為事以無味為味愛惡安除聖凡情盡而泊然棲乎性宅則大小多少一以視之而莫怨之可報哉惟德以容之而已然此無為無事無味也不可力得至易也不可目窺至細也雖至易而至難者待此以解雖至細而至大者待此以成宜可以其易與細而忽之哉學道者亦或有見於此而又以為大之心奪之故易與細不常為我有唯聖人自始至終為無為事無事味無味而不以世俗所謂大者分其心故難者大者當處寂然了無留礙而大道自此全矣此所謂成其大者也嗟乎此非特起大丈夫見理明用心剛者不能信不能守而可與輕諾多易之流道哉

其安易持其未兆易謀其脆異判其微易散為之於未

有治之于未亂合抱之木生於豪末九成之臺起于累  
土千里之行始於足下為者敗之執者失之是以聖人  
無為故無敗無執故無失民之從事常於幾成而敗之  
慎終如始則無敗事是以聖人欲不欲不貴難得之貨  
學不學復衆人之所過以恃萬物之自然而不敢為此

為反判一作破成一作層今從傅奕古本未有者心未  
起時未亂者心未染時幾平聲復反也恃一作輔非既

曰自然矣而又輔之非  
自然也今從韓非本

蘇注

方其未有持而謀之足矣及其將然非泮而散之  
不去也然猶愈于既成也故為之于未有者上也

治之於未亂者次也木也臺也行也積小成大治亂禍  
福之來皆如彼三者聖人待之以無為守之以無執故  
能使福自生使禍自止譬如種苗深耕而厚耘之及秋  
自穰譬如被盜危坐而熟視之盜將自卻世人不知物  
之自然以為非為不成非執不留故常與禍爭勝與福  
生贅是以禍至于不救福至于不成蓋其理然也聖人  
知有為之害不以人助天始終皆因其自然故無不成  
者世人心存于得喪方事之微猶有不知而聽其自然  
者及見其幾成而重失之則未有不以為敗之者矣故  
曰慎終如始則無敗事人皆徇其所欲以傷物信其所  
學以害理聖人非無欲也欲而不欲故雖欲而不傷于  
物非無學也學而不學故雖學而不害於理然後內外  
空明廓然無為可以輔萬  
物之自然而待其自成矣

呂注

其安易持危而持之則難矣其未兆易謀已動而  
謀之則難矣其脆易破則不可使至於堅其微易

散則不可使至于著物皆然心為甚通諸其心則于天下國家無難矣安也未兆也則是為之于未有也脆也微也則是治之于未亂也合抱之木生于毫末大生于小也九層之臺起于累土高起于下也千里之行起于足下遠起于近也則為之于未有治之于未亂其本末常如此也為之于未有則是以不為之也治之于未亂則是以不治治之也已有而為之則為之欲成而反敗之已亂而治之則執之欲固而反失之也是以聖人為之于未有則我固無為也故無敗治之于未亂則我固無執也故無失民之從事常在既有之後故至于幾成而敗之以不知其本故也使知大生于小高起于下遠始于近慎終如始則無敗事也是以聖人欲不欲不貴難得之貨則滑欲于俗思以求致其明非知此者也學不學以復衆人之所過以輔萬物之自然而不敢為則繕性于俗學以求復其初者非知此者也



元澤注

不欲之欲非無欲也欲在于不欲耳故不貴難得之貨而已聖人所謂無為無執者故未至于

釋然都忘也但不于性分之外更生一切耳且民飽食煖衣性所不免欲此而已不為有欲而離性之後更貴難得之貨此乃愚人迷妄失本已遠故也故聖人常欲不欲以抹其迷而反之性不學之學非無學也所學在于不學耳以復衆人之所過故也衆人逐末多事聖人以不學之學抹其過而反之道輔自然者莊子所謂反以相天是也為之則以人滅天矣故不敢為然則萬物安乎性命之常而事物無所兆矣夫豈有脫之可泮微之可散者哉

息齋注

聖人常安其所安故其安無不安而其持無所持故曰易持以不持持其安儻有微心之起自其未兆而謀之自其脆而破之自其微而散之故無有撓其安者由持其安於未有治其心于未亂譬如合抱

之木生於毫末九層之臺起于累土千里之行始于足下於無為之中自然而為于無積之中自然而積累日益去善日益積而聖人未嘗知也若有意為之即為敗之有意執之即為失之由其無為故無敗無執故無失世之於道所以難成而易壞者由其有意於為之執之方其始若無所容其勤及其終又不免于怠昏為之執之之咎也使其始不為其始不執則求其勤且不可得而況於怠歟此世所以幾成而敗也惟聖人以不欲為欲故未嘗貴難得之貨所謂難得者不必金玉也身外之物皆難得矣衆人目過于色耳過于聲吾以不學為學收視反聽復衆人之所過以輔道之自然而不放為夫宜有為之執之之病哉

**吳注**

慎終如始又承上文終無難與終不為大二終字而言始雖以為難至終而不以為難始雖不敢以

為大至終而自以為大則事幾成而敗于終者有矣故必慎終如始始以為難而終亦以為難始不為大而終

亦不為大則  
終無敗事也

**劉棻注**

欲衆人之所不欲故曰欲不欲不欲衆人之所欲故曰不貴難得之貨學衆人之所不學故曰

學不學不學衆人之所  
學故曰復衆人之所過

古之善為道者非以明民將以愚之民之難治以其智

多故以智治國國之賊不以智治國國之福知此兩者

亦稽式能知稽式是謂玄德玄德深矣遠矣與物反矣

乃至於大順

稽榘也式法也下傲曰深荀周曰遠反乃  
順者司馬曰物情莫不貴智而有玄德者

獨賤之雖反於  
物乃順於道

欽定四庫全書

老子真

五

蘇注

古之所謂智者知道之大全而覽於物之終始故足貴也凡民不足以知此而溺于小智以察為明

則智之害多矣故聖人以道治民非以明之將以愚之耳蓋使之無知無欲而聽上之所為則雖有過亦小矣苟以智御人人亦以智應之則上下交相賊耳吾之所貴者德也物之所貴者智也德與智固相反然智之所順者小而德之所順者大也

呂注

衆人昭昭我獨若昏俗人察察我獨悶悶我愚人之心也哉古之善為道者在己若此則推之于民

也固非明之將以愚之也察察昭昭則所謂明之也若昏悶悶則所謂愚之也民之失性若華而去實故智多而難治誠欲治之則去智與故鎮之以無名之樸則彼將自化而以智治之適所以亂之也蓋不識不知順帝之則而毀則為賊治國而以智則毀其則矣故曰以智治國國之賊治國而不以智則無介然之知其道甚矣而無益生

之祥則有國之母可以長久故不以智治國國之福知此  
兩者非特施之於治國而已而於身亦稽式而未嘗違也  
蓋知其子守其毋歿身不殆則不以智治之而福者也閒  
其允濟其事終身不救則以智治之而賊者也則不以智  
之與以智非亦我之稽式乎誠知稽式而不違其德可謂  
玄矣德而至於玄則深而不可測遠而不可量以情觀之  
不能莫逆于心及其至也與物反本無所于逆故曰常知  
稽式是謂玄德玄德深矣遠矣與物反矣然後乃至大順

息齋注

夫所謂道者不在耳目聲色之間而世人目視  
非色耳聽非聲為聲色之所留礙而不知見聞

覺知有出于聲色之外者今遽告人曰爾之見聞覺知  
皆非真也則人孰不怪且笑哉故道非明民將以為愚  
而憐之可也夫民之愚留礙于聲色不知自解吾方示  
之以無為示之以澹泊且猶未悟而況欲以智示之歟  
生民之患在于多智智不以正其智為邪今吾未能覺  
其邪而又以智示之是反開其偽也故以智治國為國



以其不爭故天下莫能與之爭

王之為言天下所歸往也處上聲下同樂入聲

蘇注

聖人非欲上人非欲先人也蓋下之後之其道不得不且先耳

呂注

江海之所以能為百谷王者以其善下之故能為百谷王則能為天下王者亦善下之而已則玄德

者乃所以下之道也莊周以為以此處下則玄聖素王之道而舜之在下則曰玄德升聞則玄德者固聖人所以處下之道也以處下之道而居人上乃所以之也聖人之有天下也以言其位則固欲上人也然以孤寡不穀為禡而受國之垢與不祥則以其言下之也以言其序則固欲先人也然迫而後動感而後應不得已而後起則以其身後之也夫惟以其言下之則處上而人不重不重則以戴之為輕矣以其身後之則處前而人不害不害則以從之為利矣不重不害此天下所以樂推而不厭也夫以其言下之以其身後之則不爭者

也樂推而不厭則天下莫能與之爭者也非體立德者其能若是乎故曰夫唯不爭故天下莫能與之爭

息齋注

聖人不得已臨蒞天下其視首出庶物與在民上為何等事哉故有天下而能以言下民能以

身後民非忘天下者不能也是以處民上而民不重不知其有君也處民前而民不害不知其有民也惟其上下相忘是以天下樂推而不厭蓋吾之所取者非民之所爭也無為之為天下且不見其朕况欲與之爭乎

天下皆謂我道大似不肖夫唯大故似不肖若肖久矣其細也夫我有三寶寶而持之一曰慈二曰儉三曰不敢為天下先夫慈故能勇儉故能廣不敢為天下先故能成器長今舍其慈且勇舍其儉且廣舍其後且先死



矣夫慈以戰則勝以守則固天將救之以慈衛之也

肖似夫

並音符長舍並上聲衛護也

蘇注

夫道曠然無形類然無名充遍萬物而與物無一相似此其所以為大也若似于物則亦一物耳而

何足大哉道以不似物為大故其運而為德則亦悶然以鈍為利以退為進不合于世俗今夫世俗貴勇敢尚廣大夸進銳而吾之所寶則慈忍儉約廉退此三者皆世之所謂不肖者也世以勇決為賢而以慈忍為不及事不知勇決之易挫而慈忍之不可勝其終必至於勇也世以廣大蓋物而以儉約為陋不知廣大之易窮而儉約之易足其終必至于廣也世以進銳為能而以不敢先為耻不知進銳之多惡于人而不敢先之樂推于世其終卒為器長也蓋樸散而為器聖人用之則為官長目樸成器始有屬有長矣勇廣先三者人之所共疾

也為衆所疾故常近于死以慈衛物物之愛之如父母雖為之効死而不辭故可以戰可以守天之將救是人也則開其心志使之無所不慈無所不慈則物皆為之衛矣

呂注

天下徒見我道之大而謂其似不肖而不知其所以大固似不肖也何以言之大道汎兮其可左右

無乎不在者也彼見其無乎不在無可擬者謂之似不肖而不知其無不在而似不肖乃道之所以為大也蓋萬物莫非道也則道外無物矣道外無物則無所肖者此其所以為大也若有所肖則道外有物矣道外有物則道有所不在其尚得為大乎故曰天下皆謂我道大則不肖夫唯大故似不肖若肖久矣其細也夫蓋我道大所以如此之大者以吾無我而不爭故也夫唯無我而不爭故能持人之所難持我有三寶保而持之一曰慈二曰儉三曰不敢為天下先此皆持人之所難持者也何則人不能無我而不爭故勇而不能慈廣而不能儉

先而不能後則無我不爭乃其所以能保此三寶而持之也天下有始以為天下母而我守之常寬容于物不削于人非慈乎其行身也徐而不費以約為紀非儉乎未嘗先人而常隨人人皆取先己獨取後非不敢為天下先乎夫慈為柔弱夫而能勝剛強是能勇也儉為不費矣而用之不可既是能廣也不敢為天下先為後人矣而聖人用之以為官長者皆從我者也是能成器長也今舍其慈且勇舍其儉且廣舍其後且先則剛強之徒而已死不亦宜乎夫自事觀之則軍旅之事愛克厥威允罔功則慈宜若有所不行也然自本觀之則所以能立其威者以慈而已故曰夫慈以戰則勝以守則固夫唯慈故儉儉故不敢為天下先則慈者三寶之所自而始也舍其慈則死保其慈則生則慈乃所以衛吾生者也故曰天將救之以慈術之慈立而三寶舉矣

元澤注

肖者有所似道為萬物祖故體道者物當似我我豈似物乎蓋有所似則是象彼則彼必大而

我小矣凡此三實皆俗情所謂小而乃至人之所以為大也慈王于愛愛物仁也而獨獨慈者仁則廣德以覆下于末為威夫老子方語其本故不曰仁曰慈慈者父道仁之本而不假為者也儉之為德寡欲也貴本也愛物也一言而三善至者其儉乎若孔子曰禮與其奢也寧儉蓋聖人制禮將以為儉而方其為禮也不得其奢也非禮則無末非老子則不知本本乎本乎聖人之道于是為至乎于易則謙是也天地人神皆以謙為貴故聖人實之慈者不爭而勝勇莫大焉區區以奢侈自廣者其狹甚矣唯無以未傷本無以外滅內者至廣也此聖人之行故但為器長而已若道之長則未嘗在物後也以人滅天以事勝道借使幸免蓋失所以生矣三實皆天德而立本者也正如正兵之正正兵之言師整而不動也愛民如子則民愛之如父不令而齊矣彼倒戈攻于後以死者上不忍故也一本作以戰則勝戰守主于殺伐而尚以慈為德則餘事可知

韓非解

愛子者慈於子重生者慈於身責功者慈於事慈母之於弱子也務致其福務致其福則事除

其禍事除其禍則思慮熟思慮熟則得事理得事理則必成功必成功則其行之也不疑不疑之謂勇聖人之於萬事也盡如慈母之為弱子慮也故見必行之道見必行之道則明其從事亦不疑不疑之謂勇不疑生於慈故曰慈故能勇周公曰冬日之閉凍也不固則春夏之長草木也不茂天地不能常侈常費而況於人乎故萬物必有威辰萬事必有弛張國家必有文武官治必有賞罰是以智士儉用其材則家富聖人愛寶其神則精威人君重戰其卒則民衆民衆則國廣是以舉之曰儉故能廣

董注

此假用兵以明道貴在于守慈也或云若以人身言之則邪念多于敵國利欲勝于鋒銛益亦寡欲

以至於無欲以全其所寶乎

夢得注

我自處也易物無所不濟難故即三者推慈以  
為先而終復明之以為戰則勝守則固是今之

所急也天若救斯民必使有為慈者出而  
衛之此老氏之所怛然有期于天下者與

善為士者不武善戰者不怒善勝敵者不爭善用武者

為之下是謂不爭之德是謂用人之力是謂配天古之

極

古者車戰為士甲士三人在車上左執弓右持矛中  
御車掌旗鼓皆欲其強武戰卒七十二人在車下蓋

至爭者惟兵故借之以明不爭之德也  
羅什曰心形既空孰能與無物者爭

蘇注

士當以武為本行之以怯若以武行武則死矣聖  
人不得已而後戰若出于怒是以我故殺人也以

我故殺人天必殃之以吾不爭故能勝彼之爭若皆出  
于爭則未必勝矣人皆有相上之心故莫能相為用誠

能下之則天下皆吾用也

呂注

士之為言事道而以將人為任者也事道則以不爭而勝將人則用人之力若然者何所事武哉故

曰善為士者不武為士而無所事武則善戰者不怒善勝敵者不爭善用武者為之下回其宜也何則體道者不爭不爭則天下莫能與之爭則善為士者不武善戰者不怒善勝敵者不爭是謂不爭之德也體道者能下人能下人者樂為之用而不自用則善用人者為之下是謂用人之力也德則不爭力則用人雖用兵之危我猶無為況其它乎無為為之之謂天德至于無為則與天同而無以加矣故曰是謂配天古之極為

息齋注

聖人身且不得已也故為士則不武當戰則不怒者皆其不得已也故為士則不武當戰則不怒

勝敵而不必與之爭用人而不必加其上故能以德服人而人亦樂為之死是謂配天古之極也

用兵有言吾不敢為主而為客不敢進寸而退尺是謂

行無行攘無臂仍無敵執無兵禍莫大於輕敵輕敵幾

喪吾寶故抗兵相加哀者勝矣

用兵有言古兵家有此言也行上如字下戶剛

反言行列也仍就也詩曰仍執醜虜兵五兵戈矛及戟干也說文云拱手執斤曰兵幾平聲喪去也抗舉也林

希逸云此章全是借戰事以喻道推此則書中設喻處其例甚明

**蘇注**

主造事者也客應敵者也進者有意於爭者也退者無意於爭者也苟無意於爭則雖在軍旅如無

臂可攘無敵可因無兵可執而安有用兵之咎耶聖人以慈為寶輕敵則輕戰輕戰則輕殺人喪其所以為慈

矣兩敵相加而吾出於不得已則有哀心哀心見而天人助之雖欲不勝不可得也



呂注

道之動常在於迫而能以不爭勝其施之于用兵之際宜若有所不行者也而用兵者有言吾不敢

為王而為客不敢進寸而退尺則雖兵猶迫而後動而勝之以不爭也而況其它乎何則王逆而客順主勞而

客逸進驕而退卑進躁而退靜所以順待逆以逸待勞以卑待驕以靜待躁皆非所敵也所以屬者道之為常出

於無為故其動常出于迫而其勝常以不爭雖兵亦由是故也誠知為常出于無為則吾之行常無行其攘常

無臂其仍常無敵其執常無兵安往而不勝哉苟為不能出於無為知主而不知客知進而不知退是之謂輕

敵輕敵則吾之所謂三寶保而持之者幾于喪矣故曰禍莫大于輕敵輕敵幾喪吾寶夫唯以不爭為勝者則

未有能勝之者也故曰抗兵相加哀者勝矣

吳注

此申言慈之實用兵有言者用兵者嘗有是言為主肇兵端以伐人也為客不得已而應敵也進寸

難進也退尺易退也仍就也不為首兵但為應兵雖為  
應兵亦不欲戰不敢近進寧于遠退進戰者整其行陣  
而行攘臂以執兵前進以仍敵不行則雖有行如無行  
不攘則雖有臂如無臂不執則雖有兵如無兵不仍之  
則雖有敵在前如無敵也

吾言甚易知甚易行天下莫能知莫能行言有宗事有  
君夫唯無知是以不我知也知我者希則我貴矣是以

聖人被褐懷玉

宗者族之總也  
道者事之總也

蘇注

道之大復性而足而性之妙見于起居飲食之間  
耳聖人指此以示人豈不易知乎人能體此以應

物豈不易行乎然世常患日用而不知知且不能而況  
行之乎言者道之筌也事者道之迹也使道可以言盡

則聽言而足矣。可以事見則考事而足矣。唯言不能盡事，不能見非舍言而求其宗遺事而求其君，不可得也。蓋古之聖人無思無為而有漠然不自然，不自知者存焉。此則思慮所不及，是以終莫吾知也。使為衆人所能知，亦不足貴矣。被褐懷玉者，聖人外與人同而中獨異也。

### 呂注

道法自然，其言亦希而自然。自然則無為，則知之行也。不乃甚易乎？而天下不能知不能行，何耶？

以言有宗事有君而天下不知其宗與君，是以不吾知也。何謂宗無為而自然者言之宗也？自其宗而推之則言雖不同，皆道裔而已矣。其有不知者乎？何謂君無為而自然者事之君也？得其君而治之則事雖不同，皆臣妾而已矣。其有不行者乎？惟其不知宗之與君，此所以不吾知也。夫道之所以為天下貴，以其不可以知知，不可以識識，故為天下貴。使道而可以知知，識識則何貴于道哉？故曰：知我者希，則我貴矣。是以聖人以若辱，若

愚之容而大白盛德天下  
鮮儂者是之謂被褐懷玉

息齋注

道甚易知易行而亦難知難行所謂易知者無  
道可道無學可學無為可為無事可事宜不甚

易知甚易行者哉然至道不可道而言語皆非學不可  
學而心動即偽為無為而寂然不為者未必是事無事  
而終日事事者未必非此其所以為難而天下莫知莫  
行也蓋聖人言有宗事有君故言在此而義在彼事雖  
是而心不同知言之宗則言之差殊不必問也知事之  
君則事之差殊不必疑也夫唯人之無知是以不我知  
夫唯不我知此我之所以為貴使我知之  
不出于眾之知則為我者亦不足貴矣知

宏甫注

吾言甚易知是以天下莫不知甚易行是以天  
下莫能行甚矣人之好為苟難也然雖莫能行

何者而不行雖莫不知何者而我知乎哉何也以吾言  
一出于宗而吾行一制于君而我無知焉故也使吾而

有知則人亦將以吾之知而知吾矣是以知  
為天下役也非大君與宗主夫何足貴乎

知不知上不知知病夫唯病病是以不病聖人之不病  
也以其病病是以不病

蘇注

道非思慮之所及故不可知然方其未知則非知  
無以入也及其既知而存知則病矣故知而不知

者上不知而知者病既不可不知又不  
可知唯知知為病者久而病自去矣

呂注

道之為體不知而能知者也知其不知而以不知  
知之知之至者也故曰知不知上雖知其不知而

以知之則其心庸詎而寧乎故曰不知知病夫唯知  
知之為病而病之則反乎無知而知不足知病之矣故  
曰夫唯病病是以不病聖人不病以此而已故曰以其  
病病是以不病南伯子綦曰我悲人之自悲者吾又悲

夫悲人者吾又悲夫悲人之悲者其後而日遠矣若子綦者可謂病病者乎

### 息齋注

知者逐物故多偽不知者返本故近真人能知不知為近真知知為多偽則為上矣儻不知知

之為偽而徒益其知則是以病為藥其病有不可勝言者惟知知之為病是以不病聖人所以不病者以其知之也

### 筆乘

道以知入以不知始以知無遣其有隨以不知遣其釋氏之無知也始以知無遣其有隨以不知遣其

知萬法歸無無亦不立非上而何彼於虛空之中橫生意見清淨之內忽起山河捏目生華迷頭認影則病矣凡有知皆妄也凡有妄皆病也學者方狃以為玄覽竇而持之病奚從瘳乎聖人之不能廢知猶夫人也而知不為病者知知之為病故耳知其為病則勿藥而病瘳矣知不知上所謂生而無生真性湛然也不知知病所

謂無生而生業果宛然也唯其病病是以不病所謂知幻即離不作方便也

民不畏威則大威至矣無狹其所居無厭其所生夫唯

不厭是以不厭是以聖人自知不自見自愛不自貴故

去彼取此

威畏古通用人不畏其所當畏則大可畏者至矣下文皆畏其所當畏之事狹胡夾反一

作狎厭  
於藍反

蘇注

夫性自有威高光明大赫然物莫能加此所謂大威也人常患溺于眾妄畏生死而憚得喪萬物之

威雜然乘之終身惴惴之不懈雖有大威而不自知也苟誠知之一生死齊得喪坦然無所怖畏則大威熒然見于前矣性之大可以包絡天地彼不知者以四肢九竅為己也守之而不厭是以見不出視聞不出聽叢然

其甚陋也故教之曰無狹其所居彼知之者知性之大而吾生之狹也則愀然厭之欲脫而不得不知有厭有慕之方圓于物也故教之曰無厭其所生夫唯聖人不狹不厭與人同生而與道同居無廣狹淨穢之辨既不厭生而後知生之無可厭也聖人雖自知之而不自見雖自愛之而不自貴以眩人恐人之有厭有慕也厭慕之心未忘則猶有畏也畏去而後大威至也

### 呂注

民不冥于道而唯識知之尚故生生厚生生厚故輕死輕死故不畏威民至于不畏威則無所不為

此天之所自以明威而大降其虐也故曰民不畏威則大威至矣夫唯以道治天下者知夫充滿天地包裹六極凡命于天者其居之所同然也勿狹之而已精神四達並流無所不極凡命于天者其生之所同然也勿厭之而已夫民無常在而我而已夫唯我不厭是以民亦不厭也則莫不畏威之有哉是故聖人自知以常而不自



見以外其身知常而外其身乃所以不狹其居也自愛以嗇而不自貴以遺其生愛嗇而遺其生乃所以不厭其生也故去彼知識之病而取此不識不知之不病也

元澤注

民樸而主厚則畏威上失其道多乎有為以小其道塞其生故民巧偽彫薄而威不能服也夫

如是則天誅所加禍亂將起故曰大威至民性本自廣大流通而世教下衰不能使之復樸乃覺其居之廣而使狹厭其生之通而使塞夫唯狹其居故民不淳而偽唯厭其生故民不厚而薄聖人不然使民逍遙乎天下之廣居而各遂其浩然之性則其有于威者乎莊子曰狽韋氏之國黃帝之圓堯舜之宮湯武之室此明世世下良漸狹其居也彼聖人豈有優劣乎而居乃漸狹者所遭之時則然也上不自厭其生而盡性故民亦得盡性也莊子曰不厭其天此之謂也厭者天厭之之厭自見則矜成自貴則賤物此所以自狹其居自厭其生亦

以狹民之居厭民之生也自知則明乎性而不為妄自愛則保其身而不為非夫然則豈至于干天之威也

**董注**

居者性之地居天下之廣居則與太虛同其體矣生者氣之聚含太一之至精則與造化同其用矣

惟由士不可以語道苟不溺于小術而實所無以自狹其居則必棄有著無而蔽于斷滅以厭其所生矣是以

告之以無狹無厭使學者知夫性者氣之帥而其大無量當擴而充之以全其大生者道之寓而其用不窮當

葆而養之以致其用則養氣全生盡性至命而不生厭慕之心所以體無非彊無而無非頑也長生非貪生而

生非礙也夫如是則主與道居而道亦未嘗厭棄于人矣見賢過切顯也去上聲自知則返照無畏而不狹其人

居自愛則絕外嗜欲而不厭其生惟自知自愛所以居之安也而不自見以矜能不自責以賤物故無知之之

見忘愛之之心也

息齋注

夫欲人之畏愛者皆內不足而外慕者也聖人足於內視人之喜不加益其不畏不加損是以

皆與之無為蓋居物之上使人畏已者易使人不畏已者難使我忘人者易使天下兼忘我者難民不畏威非天下兼忘我者不能也此豈非所謂道德之威乎聖人之遇物隨所遇而安故不狹其所居不厭其所生蓋知其所居所生者皆非其實也我惟不自厭故生亦莫吾厭由其自知而不自見其有知由其自愛而不自責其有愛使其有自見自責之心則狹其所居厭其所生有不能一日安矣

吳注

威可畏者損壽戕身之事大威大可畏者死也人

者至矣莊子曰人之所取畏者衽席之上飲食之間而不知為之戒者過也狎玩習也所居身之所處厭猶惡而棄之也平日所處凡損壽戕身之事無所畏憚狎習為常安然為之言不畏威也厭所生謂陽生速死是厭

愚其所生而棄其命大威至矣夫惟不狎焉本作不厭  
廬陵劉氏云上句不厭當作不狎今從之夫惟不狎其  
所居而畏所畏是以不厭其所生而大可畏者不至矣  
自知自知愛身之道自見自顯著所知以示人自貴即  
後章責生言貪生之心太重也聖人于自愛之道雖自  
知于中然含德襲明知若不知不表表示人自見于外  
雖自愛之為然體道自然若無以生為亦不切切貪生  
自貴之過彼謂自見自貴此謂自知自愛上文言不畏  
則有大威之禍不狎則有不厭之禍皆為衆人言爾若  
聖人則不待畏而自無可畏不待毋狎而自無所狎內  
有自知自愛之實而外無自見自貴  
之迹所無者所去也所有者所取也

勇于敢則殺勇于不敢則活此兩者或利或害天之所  
惡孰知其故是以聖人猶難之天之道不爭而善勝不

言而善應不召而自來緘然而善謀天網恢恢疎而不

失

殺猶死也利謂活害謂殺惡去聲緘音關舒緩也王作坦嚴作默不如作輝為長蓋默則重不言坦則近

不爭也

蘇注

勇于敢則死勇于不敢則生此物理之常也然而敢者或以得生不敢者或以得死世遂僥倖其或

然而忍其常理夫天道之遠其有一或然者孰知其好惡之所從來哉故雖聖人猶以常為正其于勇敢未嘗不難之列子曰逆天意揣利害不如其已患天道之難知是以歷陳之不與物爭于一時要于終勝之而已天何言哉四時行焉百物生焉未有求而不應者也神之格思不可度思矧可射思夫誰召之哉緘然舒緩若無所營而其謀度非人之所及也世以耳目觀天見其一曲而不覩其大全有以善而得禍惡而得福者未有不

疑天網之疎而多失也惟能要其終始而盡其變化然後知其恢恢廣大雖疎而不失也

**呂注**

用其剛強而必於物者勇于敢者也則死之徒是已故曰勇于敢則殺致其柔弱而無所必者勇于

不敢者也則生之徒是已故曰勇于不敢則活勇于敢者人以爲利而害或在其中矣勇于不敢者人以爲害而利或在其中矣然則天之所惡殆非可以知知而識識也故曰此兩者或利或害天之所惡孰知其故是以聖人之動也豫若冬涉川猶若畏四鄰猶難之若此者以天之惡爲不可知故也夫唯不可知則不識不知乃所以順帝之則也蓋天之生物因其材而篤焉哉者培之傾者覆之則未嘗與物爭者也而物莫能違之者故曰不爭而善勝天何言哉四時行焉百物生焉其行其生未嘗差也故曰不言而善應莫之爲而爲者天也莫之致而至者命也故曰不召而自來易則易知而其道易虛與時消息而未嘗違故曰坦然而善謀天聰明自

我民聰明天明威自我民明威其聰明明威未嘗自用而惠吉逆凶猶影響也故曰天網恢恢疎而不失夫唯天之道不可知為如此聖人所以勇于不敢而不識不知乃知所以順之也

息齋注

人皆知勇于不敢者蹈中庸也故曰白刃可蹈也

中庸不可能也以兩者較之蹈白刃者有害而人輕其害蹈中庸者有利而人不知其利此中庸所以為難者歟輕于用勇人之所嫉天之所惡孰知其故雖聖人猶難之況眾人乎蓋天之道不爭而善勝不言而善應不名而自來輝然而善謀知其慈于用勇也自其天之未勝天之未應及來之未至謀之未定而言之則强者或得勇者或勝蓋有之矣要其後而徐觀之然後知天網恢恢疎而不失也

吳注

敢為惡之人乃天所惡然天之所惡深昧難測何以知其果為天所惡之人乎其人雖可殺聖人猶

有難之之意而不敢輕易殺之也聖人不輕易殺之則為惡者皆得漏網而天網不漏也天之于惡人非如人之以力與爭而天定自能勝人非如人之以口與言而其應如響應聲其報應之速不待名之而自來至惡有惡報雖用智計不可逃免天雖無心坦然平易而巧于報應有非人謀之所能及此天網恢恢廣大似若疏而不密然未嘗失一惡人無得漏網者聖人雖不殺之而天自殺之也

宏甫注

勝以不爭應以不言求以不召正天之疎而不失也若爭而後勝雖不疎必有失矣

民常不畏死奈何以死懼之若使人常畏死而為奇者吾得執而殺之孰敢常有司殺者殺而代司殺者殺是

代大匠斲夫代大匠斲希有不傷其手矣

斲 斷  
角 反



蘇注

政煩刑重民無所措手足則常不畏死難以其詭異之無益也民安于政常樂生畏死然後執其詭異

亂羣者而殺之孰敢不服哉司殺者天也方世之治而有詭異亂羣之人恣行于其間則天之所棄也而吾殺之則是天殺之而非我也非天之所殺而吾自殺之是代司殺者殺也代大匠斲則傷其手矣代司殺者殺則是

及其月矣

呂注

民之為道固常不畏死者也唯無狹其所居無厭其所生則可以使之畏威而重死矣奈何以死而

懼之而欲其畏死乎何以知其然也若使民常畏死而為奇者吾得執而殺之則孰敢不畏死而為奇乎然而執之而不勝殺之而不止者則民之不畏死而不可以死懼之明矣然則以道治天下者宜如何哉常有司殺者殺勿代之而已矣何謂常有司殺者殺天網恢恢疎而不失天討有罪五刑五用則司殺者天之謂也刑戮

有出于好惡而不用于天討則是代司殺者殺也代司殺者殺是代大匠斲代大匠斲希有不傷其手者矣則代司殺者殺其傷可知也

**張耒**

夫人生不殺之于衽席飲食之疾病則殺之盜賊刑戮者過半矣則人之于死實未嘗知畏也而

世之馭物者而欲物之畏不過示之以死亦惑矣故曰民不畏死奈何以死懼之苟畏死邪則吾取為奇者而殺之宜民之不復為奇也天下未嘗無刑而為奇者不止則死之不足以懼物也明矣故曰若使人畏死而為奇者吾得執而殺之孰敢也夫物不患無殺之者也萬物泯泯必歸于滅盡而後止則常有司殺者殺矣竊司殺者之常理而移之以行其畏非徒不足以懼物而亦有所不及者也故曰常有司殺者殺夫代有司殺是代大匠斲希有不傷其手矣然則操政刑死生之柄驅一世之民使從之殆非也

息齋注

此言世之刑法不足恃以爲治也民不畏死吾奈何以死懼之使民果死有爲奇者執而殺

之則殺一人足以爲治矣然愈殺而愈不可禁則刑之不足恃也秦人用法嚴其網密而姦宄不勝漢用法疎網漏吞舟之魚而天下歸於漢此亦足以見矣天道福善禍淫是有司殺者于冥冥之中不可逃也若必代司殺者殺如代大匠斲未有不傷手者也

薛注

我朝太祖皇帝道德經序曰朕自即位以來罔知前代哲王之道問道諸人人皆我見一日試覽羣

書有道德經一卷見其文淺意奧久之見本經云民不畏死奈何以死懼之當是時天下初定民頑吏弊雖朝有十人棄市暮有百人仍爲之如此者豈不應經之所云朕乃罷極刑而囚役之不逾年而朕心減朕知斯經乃萬物之至根王者之上師臣民之極寶非金丹之術也於戲太祖蓋天縱大聖人故其聰明睿智知言之奧

如此夏聰明作元后太祖之謂矣  
仁人之言其利溥哉老子之謂矣

民之飢以其上食稅之多也是以飢民之難治以其上  
之有為也是以難治民之輕死以其生生之厚也是以

輕死夫唯無以生為者是賢于貴生

稅租也純甫云無以生為者賢于貴

生即吾無吾身吾有何患之意此章之言由粗及精要歸其重于此耳

蘇注

上以有為導民民亦以有為應之故事多而難治上以利欲先民民亦爭厚其生故雖死而求利不

厭貴生之極必至于輕死惟無以生為而生自全矣

呂注

一夫之耕足以食數口則奚至於飢哉而至於飢者非以其上食稅之多故既邪穢而衣耕而食是

謂同德奚難治哉而至于難治者非以其上之有為故  
難治耶甘其食美其服安其俗樂其居則奚至于輕死  
哉而至於輕死者非以其生之厚故輕死耶是以聖  
人無事而民自富無欲而民自樸則至于食稅之多而  
飢無有也無為而民自化好靜而民自正則至于有為  
而難治無有也自富自樸自化自正而不飢以難治則  
至於生之厚而輕死無有也蓋所以生之厚而至於  
于輕死者以其踉跂好知爭歸于利而不可止故也夫  
唯生之厚遂至于輕死則無以生為者賢于貴生可知  
知矣是故聖人不自見以外其身不自貴以遺其生可知  
其無以生為而已矣

**息齋注**

上多取則下貧上有為則下亂必然之理也我  
欲厚其生則不顧人之生我厚而彼薄彼安得

不輕死聖人之于生蓋不得已彼視其生若無以生為  
也豈肯厚吾之生而奪人之生哉是之謂賢於貴生

人之生也柔弱其死也堅強草木之生也柔脆其死也

枯槁故堅強者死之徒柔弱者生之徒是以兵強則不

勝木強則共強大處下柔弱處上腕輒也徒類也合手

七日大共秦伯怒蹇叔曰基木拱矣皆合拱也董音如字言人共伐之也處上聲

蘇注

冲氣在焉則體無堅強之病至理在焉則事無堅強之累兵以義勝者非強也強而不義其敗必速

木自拱把以上必伐矣物之常理精者在

呂注

道之為物無形而不爭則天下之至柔弱而人莫之喻也故以有形喻之人生也柔弱其死也堅

強草木之生也柔脆其死也枯槁則雖有形者亦以堅強而死柔弱而生而沉體無形之道而不致其柔弱其

可得乎是以兵強則恃之而驕而敵國之所謀也我驕而敵謀所以不勝也木強則伐伐之所以共而舉之也非徒然也而以位言之則天以氣在上地以形在下氣則柔弱形則堅強臣以有為事上君以無為畜下有為則堅強無為則柔弱堅強居下柔弱處上物之理也然則柔弱之能勝剛強可知矣

**息齋注**

此章汎言柔弱之必生剛強之必死柔弱雖非所以為道而近于無為剛強雖未離于道而涉于有為無為則去道不遠有為則吉凶悔吝隨之益遠于道矣

**吳注**

用兵示弱者謀深而工敵輕而玩之故勝恃強者慮淺而驕敵懼而備之故不勝兵法始如處女敵人開戶示之弱也後如脫兔敵不及距則能勝之夫秦兵過周起乘三百竟敗于散齊兵入晉焚石投人竟敗于鞏此恃強不勝之驗也共兩手所圓也木之弱而搖動者為近末之小枝強而不搖動者則為近根合共之

大輪也因言兵而并及于木上文言兵強者為人所勝是處下也不能如勝人者之處上木強者近根之輪是處下也不得如小枝之處上推此物理則知人之德行凡堅強者矜已凌人必慶其貴高而反處人下矣柔弱者眾所尊戴而得一處人上矣

天之道其猶張弓乎高者抑之下者舉之有餘者損之不足者補之天之道損有餘而補不足人之道則不然損不足而奉有餘孰能以有餘奉天下唯有道者是以

聖人為而不恃成功而不居其不欲見賢耶

抑之舉之二句言張

方有餘不足二句言天道凡弛弓俯其體則弣在上稍向下的而其體則弣在下稍在上是抑弣之高者



使之向下舉消之下者使之在上天之損有餘如抑其  
劑而使之下其補不足如舉其消而使之高見賢適反

**希聲注**

易曰立天之道曰陰與陽陽主升陰主降陽升  
極天則降陰降極地則升此則抑高舉下蓋張

弓之象也天道盈虛一章七閏損日之有餘補月之不  
足人道則不然損其不足之民而奉有餘之君孰能法

天之道以為人道損己之有餘以奉天下之不足其唯  
有道者乎在易損下益上曰損損上益下曰益以下為  
本也是以聖人能為之而不恃其事能成功而不居其  
所以其不欲見賢于人故天下謂之似不肖皆損有餘  
奉不足之旨也

**蘇注**

張弓上筋弛弓上角故以況天之抑高舉下天無  
私政均人多私故不均有道者瞻足萬物而不解

既以為人已愈有既以予人已愈多非有道者無以堪  
此為而恃成而處則賢見于世賢見于世則是以有餘

也  
自奉

呂注

張天之道無為而已矣無為則無私無私則均猶之

補之適于均而已矣夫天之道非故以抑高而舉下也

無為任物之自然則高者為有餘不得以抑高而損下者

為不足不得舉而益滿招損謙受益時乃天道是也

人之道不能無為不能無為則不能無私不能無私則

至于損不足以奉有餘不足異也夫唯有道者知未始

有物而有為之與功名皆我所餘而天下之所不足而

爭之故損之以奉天下而不有比故曰孰能損有餘以

奉天下唯有道者聖人則有道者也是以為而不恃功

成不居其不欲見賢者無

它凡以法天之道而已矣

息齋注

良多以益寡者天之道也寡寡而益多者人之

道也惟聖人能以己有餘而奉人不足故其能

及萬物而不恃其能功蓋天下而不居其功利澤  
施于天下而不欲見其賢唯有道者而後如此

天下莫柔弱于水而攻堅彊者莫之能先以其無以易  
之也故柔之勝剛弱之勝彊天下莫不知莫能行是以  
聖人云受國之垢是謂社稷主受國之不祥是謂天下  
王正言若反

蘇注

正言合道而反俗俗以受  
垢為辱受不祥為殃故也

呂注

天下之物唯水為能因物之曲直方圓而從之則  
是柔弱莫過于水者也而流大物轉大石穿突陵

谷浮載天地唯水為能則是攻堅強者無以先之也所  
以然者以其雖曲折萬變而終不失其所以為水是其

無以易之也夫水之為柔弱而柔弱之勝剛強天下莫不知而老子數數稱之何也以天下雖莫不知而莫能行也夫聰明睿智足以有臨矣則其患者宜在于材力之不足也顧未能損有餘以奉天下持之以柔弱而常為名尸智主事任謀府之所累耳故老子論道德之將終而數數及此又引聖人言以信之曰受國之垢是謂社稷上受國之不祥是謂天下王明所以服天下者在此而不在彼也夫三代之王必先其令聞而曰受國之垢與不祥而為社稷主為天下王何也蓋必先其令聞非過名之言也不及名之言也受國之垢與不祥則過名之言也名不足以言之也不及名之言應事應事言之變也過名之言體道體道言之正也正言而曰受國之垢與不祥故曰正言若反湯武之言曰萬方有罪在予一人此知以國之垢與不祥而受之者也

宏甫注

以堅強攻堅強雖能勝之終必缺陷故攻堅強者莫勝于柔弱柔弱者不期勝而自勝也故又

戒之曰其無以輕易柔弱為也畢竟柔弱能勝剛強而剛強者不與焉夫山藪藏疾至柔也川澤納汙至弱也苟為社稷之王而不能受多方之垢為天下之王而必欲國家之無天孽四海之無凶人可得耶雖欲剪除而撲滅之祇自勞耳此蓋若反于正言其實天下之正言也不可不察也

和大怨必有餘怨安可以為善是以聖人執左契而不責于人故有德司契無德司徹天道無親常與善人

告契

計反徹徹法也直列反

蘇注夫怨生於妄而妄出于性知性者不見諸妄而又何怨乎今不知除其本而欲和其末故外雖和而

內未忘也契之有左右所以為信而息爭也聖人與人均有是性人方以妄為常馳騫于爭奪之場而不知性

之未始少妄也是以聖人以其性示人使知除妄以復性待其妄盡而性復未有不廓然自得如右契之合左不待責之而自服也然則雖有大怨懟將渙然冰解知其本非有矣而安用和之彼無德者乃欲人人而通之則亦勞而無功矣徹通也天道無私惟善人則與之契之無私也

呂注

復讎者不折鏃于雖有忮心不怨飄瓦是以天下平均不由此道則怨之所生也而人欲和之不可

勝解矣故曰和大怨者必有餘怨不善者吾亦善之乃所以為德善和大怨而不免于有餘怨安可以為善哉是以聖人執左契而不責于人是乃使復讎者不折鏃于雖有忮心不怨飄瓦而天下平均之道也蓋古之獻車馬執右契右契所以取左契所以與則左契者常以與人而不為物主者也聖人為而不恃功成不居每以有餘奉天下至于殺人則有司殺者殺而未嘗尸之則是執左契以與人而不為物主此其所以無怨而不責

于人之道也夫豈以和之為悅乎故有德司契則不責于人而已無德司徹以通物為事者也天道無親常與善人無親而唯善人之與是亦以執左契而不責于人之道也

**息齋注**

怨之不可和猶火之不可寒水之不可熱若強和之必有餘怨以此為善未足也是以聖人治

天下如執左契以求于右契恩怨取與吾何心哉如契之合適於符而已苟有不合不強其所無不責之也蓋大小長短彼各有契自合其合而吾無容私焉若必欲強通之是司徹非司契也天道亦然天道無親常不失善蓋亦司契而已

**吳注**

執左契不責于人無心待物也契者刻木為券中分之各執其一而合之以表信服財物于人曰責

契有左右左契在主財物者之所右契以付來取財物之人王元澤曰史記云操右契以責事禮記云獻田宅

者操右契則知左契為受責者之所執激謂執左契者已不責于人待人來責于已有持右契來合者即與之無心計較其人之善否和怨者有心于為善人也不若無心待物如執左契而不責于人靜中觀物而任其自然也有德無心待物無德有心待物徹通也古者助法周改助為徹法恐八家私田所收之不均故八家私田亦令通力合作而均收之八家所得均平而無多寡之異司左契者任人來取無心計較其人故曰有德司徹法者患其不均有心計較故曰無德和怨者恐善人受害有心為之亦如司徹者有心于為力弱之家恐其所得者寡矣

小國寡民使有什伯之器而不用使民重死而不遠徙雖有舟車無所乘之雖有甲兵無所陳之使民復結繩



而用之甘其食美其服安其居樂其俗鄰國相望雞犬

之音相聞民至老死不相往來

漢書詔天下吏舍無得置什器顏師古注云五

人為伍十人為什則共器物故通謂什伍之具為什物不用者無往來免儲備省徭役也舟輿甲兵舉其重者言之樂入聲望平聲相望相聞近也至老死久也近而且久不相往來者各足故也道足則無事咨詢財足則

不相假

**蘇注**

老子生于夏周文勝俗弊將以無為救之故于書之終言其所志願得小國寡民以試焉而不可得

耳氏各安其分則小有材者不求用于世什伯人之器則材堪什夫伯夫之長者也事少民朴雖結繩足矣內足而外無所慕故以其所有為美以其所處為樂而不復求也民物繁夥而不相求則彼此皆足故也

呂注

三代以來至于周衰其文弊甚矣民失其性命之情故老子之言救之以質以反太古之治小國寡

民使有什伯之器而不用使民重死而不遠徙雖有舟輿無所乘之雖有甲兵無所陳之此救之以質而反乎太古之道也莊周稱至德之世曰昔者容成氏大庭氏伯皇氏中央氏栗陸氏驪畜氏軒轅氏赫胥氏尊盧氏祝融氏伏羲氏神農氏當是時也民結繩而用之甘其食美其服樂其俗安其居鄰國相望雞犬之音相聞民至老死而不相往來則若此者非特老子之言而已古固有是道也然詩書之所言則止于堯舜三代而老子欲反太古之治何哉曰夫道與世之交相喪久矣非大道不足使人反性命之情言道而不及其世不足以知古道之已試此其所以必反太古之治也然則世去太古也久矣遂可以盡復乎曰未可也然則其言之何也曰禮至于兼三王樂至於備六代其文極矣然而禮不以立水大羹而措之醴酒和羹之下樂不以鳴管清聲

加之朱絃，越之上者，使人知禮樂之意，所不得已者。如彼而所欲，反本復始，如此也。方斯時也，孔子方求文。武周公之墜緒而脣之，老子論其道與世，如此其意，猶是而已矣。譬之月建已而火始王，而金氣已生于其間矣。此五材所以相繼而不絕也。故聞古之治，雖有什伯之器而不用，有舟輿而不乘，有甲兵而不陳，則舉大事用大衆，非得已也。聞其民結繩而用之，鄰國相望，雞犬相聞，至老死而不相往來，則煩文倦令，督稽趣留而足迹接乎諸侯之境，車軌結乎千里之外，非得已也。則不得已者，常在於此，而所欲復者，常在於彼也。則其肯煩事為以深治人之過乎？然則欲天下不安，平泰不可得也。即歿而不言，猶屏玄水，徹疏越其孰知禮之能儉而樂之節樂為反本復始之意乎？夫聖人之言，豈小補哉？

元澤注

小國寡民，則民淳厚，蓋國大民衆，則利害相摩，巧偽日生，觀都邑與聚落之民，質詐殊俗，則其

驗也無道之世民貪土瘠而利欲勝乎好生未咸本哀而貪求在乎外慕故觸刑犯險如履平地而車轍足跡交乎四方矣樂生遂性則重死安土無求則不遠徙此盡性之治民亦盡其性者也竊嘗考論語與孟子之終篇皆稱堯舜禹湯聖人之事業蓋以為舉是書而加之政則其効可以為此也老子大聖人也而所遇之變適當反本盡性之時故獨明道德之意以收斂事物之散而一之于樸誠舉其書以加之政則化民成俗此篇其効也故經之義終焉

**吳注**

十人為什百人為伯什伯之器重大之器眾所共

死者視死為重事而愛養其生不遠徙者生於此死於此不他適也老子欲挽衰周復還太古國大則民眾難治得小國寡民而治之使其民毋慕于外自足于內如此也舟車甲兵非一人所可獨用謂什伯之器也無所

乘無所陳不用也無所住則無用乎舟與無所爭則無用乎甲兵民淳事簡上古結繩之治可復雖有書契亦不可不用不但不用什伯之器而已以所食之食為甘以所服之服為美充然自足愛養其生言重死也以此身之君為安而安之以此地之俗為樂而樂之言不遠徙也惟老死于所生之處孰肯輕易遠徙哉民皆懷土雖相鄰之國目可以相望雞犬之聲耳可以相聞如此至近至老死不相往來不但不遠徙而已

信言不美美言不信善言不辯辯言不善知者不博博者不知聖人不積既以為人已愈有既以與人已愈多

天之道利而不害聖人之道為而不爭

為人之為去聲

蘇注

信則為實而已故不必美美則為觀而已故不必信以善為主則不求辯以辯為主則未必善有一

以貫之則無所用博博學而日益者未必知道也聖人抱一而已他無所積也然施其所能以為人推其所有以與人則可以有盡而一無盡然後知一之為貴也勢可以利害則可以害人夫力足以為之則足以爭之矣能利能害而未嘗害能為能爭而未嘗爭此天與聖人大過人而為萬物宗者也凡此皆老子之所以為書與其所以為道之大略也

故于終篇復言之

**呂注**

契道之為物視之不見聽之不聞搏之不得可以默契不可以情求者也則信言者信此而已安事美

善言者善此而已安事辯知言者知此而已安事博內是觀之則美者不信辯者不善博者不知可知已何則雖美與辯與博而不當于道故也道之為物未始有物者也聖人者與道合體夫何積之有哉唯其無積故萬物與我為一萬物與我為一則至富者也故既以為人已愈有既以與人已愈多使其有積也則用之有時而

既夫安能愈有而愈多乎老子之言也內觀諸心外觀諸物仰觀諸天俯觀乎地無有不契是信也然而下士聞而笑之天下以為似不肖是不美也言之至近而指至遠是善也然而非以言為悅是不辯也其知至于無知是知也而其約不離乎吾心是不博也而學者以美與辯與博求之則疏矣老子之道也以有積為不足雖聖智猶絕而棄之是無積也故至無而供萬物之求則是愈有而愈多也而學者于是不能剝心焉則不可得而至也凡物有所利則有所不利有所不利則不能不害矣唯天之道無所利則無所不利無所不利則利而不害矣凡物之有為者莫不有我故有爭聖人之道雖為而無為無為故無我無我故不爭是天之道而

矣已

筆乘

或曰老氏之為書使人得以受而味焉則近乎美窮萬物之理而無不至則近乎辯察萬事之變而

無不該則近乎博然不知其有信而不美善而不辯知而不博者存何也則以五千言所言皆不積之道耳不積者心無所住之謂也夫積而不積則言而無言矣言而無言故非不為人也而未嘗分己之有非不予人也而未嘗損己之多斯何惡於辯且博哉苟非不積之道而求執其意見以與天下爭則多言數窮者流非天道也天之道利而不害聖人之道為而不爭學者于此而制心焉老氏之書亦思過半矣故曰教而無教何必杜口然毗耶言乃忘言自可了心于柱下讀者其勉旃哉

老子翼卷二